



10. 6. 268



184  
I  
HIERONYMI TARTAROTTI

ROBORETANI

DE EPISCOPATU SABIONENSI

S. CASSIANI MARTYRIS,

DEQUE S. INGENUINI

EJUSDEM URBIS EPISCOPI ACTIS,

AD ANTONIUM ROSCHMANNUM

J. U. L.

ET CENIPONTANÆ BIBLIOTHECÆ CUSTODEM

EPISTOLA.



VENETIIS, MDCCL.

TYPIS JO. BAPTISTÆ PASQUALI  
SUPERIORUM PERMISSU.

II

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

HERBONUM TALENTUM

ANTONIO ROSCHMANNO J. U. L.

HIERONYMUS TARTAROTTUS

S. P. D.

I. **P**Ræstiti tandem , erudite Vir , quod postremis litteris meis me facturum receperam . Tuas scilicet *Conjecturas* perlegi de Episcopatu Sabionensi S. Cassiani Martyris , quas pro humanitate tua ad me misisti . In iis multa offendi , quæ patriis rebus illustrandis lucem afferant non exiguam , plura diligenter atque erudite collecta ; quædam etiam solide excogitata : sed , ut quod sentio , tibi homini candidissimo ingenue eloquar , fidemque meam liberem , qua illud sponderam me facturum ; magna eorum pars nimis longe petita , neque suo loco posita æquis rerum æstimatoribus videri possit . Quædam sunt etiam satis obvia ac per se nota , a quibus probandis supersedere utique poteras , ne scilicet chartis implendis studuisse libentius videreris . Præterea quæstionis status non statim initio clare ac perspicue proponitur , nec quibus difficultatibus ea implicetur exponis , ex quo fit , ut præpostere eam pertractare cogaris , nulla methodi ratione adhibita , cujus ce-

teroqui tanta in rebus difficilioribus eno-  
dandis explicandisque vis est.

II. Quod ad summam disceptationis atti-  
net, in qua omnem lapidem moves, ut non  
modo Cassianum, sed alios insuper ante In-  
genuinum Sabionenſi Eccleſiæ Episcopos  
præſuiſſe evincas, parum te, immo nihil  
arbitror confeſiſſe. Quid fieri, quid eſſe  
potuit, ſumma animi contentione perqui-  
ris: at in rebus ad Hiſtoriam pertinenti-  
bus, non quid fieri potuerit, ſed quid fa-  
ctum ſit, perquirendum. Adſunt idonei te-  
ſtes; qui diſertiſſime aſſerunt, Ingenuinum  
*PRIMUM* Sabionenſis Eccleſiæ Præſulem  
ſuiſſe, *Anonymus* ſcilicet Mabillonianus a  
me laudatus in Diſſertatione *De origine Ec-  
cleſiæ Tridentinæ* §. xxv. pag. 46. quod per-  
inde eſt, tum Caſſianum, tum alios ab Ec-  
cleſia illa Episcopos amovere: tu tamen  
Caſſianum ejusdem Episcopum eſſe potuiſ-  
ſe contendis, atque ea ratione Sancti illius  
Martyris Sabionenſem Episcopatum aſſer-  
tum maxime tibi perſuades. At quid hoc  
aliud eſt, quam, Argumentis relictis, Con-  
jecturas ſectari, & ubi Scientia haberi po-  
teſt, Opinione contentum eſſe? Critices  
Artis, Criticorumque omnium conſtans &  
firmiſſima regula eſt, ut Conjecturæ Proba-  
tionibus convellantur: tu contra Conjectu-  
ris & quidem infirmis, validiſſimas Proba-  
tiones

tionés oppugnare conaris. Certe si ita argumentari liceret, quidquid lubet, quidquid imaginatione assequimur, adstrui nullo negotio posset.

Tellum a me allatum extraneum esse clamas (pag. 59.) qui proinde Domesticis Catalogis minime sit præferendus. Sed si anonymus est, cujus tum nomen, tum patria ignoratur, quo jure extraneus a te dicitur? Patriam indica, deinde extraneum voca. *Advenam* se ipsum quidem appellat ad *Arietem Episcopum* scribens, sub cujus Arietis nomine Adalramum Archiepiscopum Salisburgensem latere, post *Mabillonium* opinatur *Marcus Hansizius Germania Sacrae Tomo II. in Corollarius pag. 977. Num. 128.* At posita hac doctorum virorum conjectura, neutiquam tamen inde inferri potest *Anonymum* illum aut Ratisponensem exempli gratia, aut Frisingensem, aut denique Sabionensem non fuisse. Verum si extraneus, si indigena sit, non natali solo, sed ætatis prærogativa æstimandus a nobis est, quippe qui sæculo IX. ineunte floruerit, *Quo nihil* (ut recte monet *Antonius Pagi* in *Critica in Annales Baronii* ad annum DCXXXVIII. Num. 9.) *habemus antiquius de Episcopis Metropoli Saltzburgenfi subditis.* Qua fronte Domesticos Catalogos cum hoc Auctore committere audes, qui



recentissime pro lubitu conficti, vetustatem temere jactant., atque, ut tu ipse fateris (pag. 32.) ex popularibus traditionibus non raro coalescunt? Quæ quidem traditiones quam inficetæ, quam fabulosæ, quam a veteris Ecclesiæ facie alienæ sint, supervacuum est hoc loco differere, quum satis perspicua res sit in Ecclesiastica Historia vel mediocriter eruditis. Cui veritas sapit, ægre admodum hoc tuo cibo palato satisfecerit, idem enim est ac inventis jam frugibus, glande nihilominus delectari. Non est hoc ditescere opibus, quibus nostra hæc ætas abundat, neque undique conquirere monumenta, quibus patriæ historiæ tum sacræ, tum profanæ lux afferatur, in quo uno tu ipse in Epistola Nuncupatoria tuarum *Conjecturarum* totum te esse testaris. Est potius in ipsa divitiarum affluentia paupertatem sponte eligere, & non modo nihil detegere, quo historia Ecclesiastica Teriolenfis illustretur, verum etiam detectis jam vulgatisque monumentis pertinaciter uti nolle, & in tanta nostri sæculi luce, barbarorum temporum caliginem ac tenebras consecrari.

Argumentum, quod ex *Prudentii* silentio eruitur, ut Cassianus ab Episcoporum albo expungatur, ingeniose quidem tota ferme illa tua Dissertatione extenuas; & quamquam

quam maximam ex eo vim argumentum illud capiat, quod Martyrum, quos suis versibus celebrat *Prudentius* episcopalem dignitatem non tacuerit, ut exemplis Fructuosi, Quirini, & Cypriani palam sit, indeque recte inferatur, silentio eandem non fuisse præteriturum, si hoc itidem de Cassiano affirmari jure potuisset; tamen quando auctoritas ajens nulla contra te afferri posset, aliqua forte verisimilitudine opinio tua niteretur: nunc quum argumentum, quod *Anonymus* suppeditat, positivum sit, ut vocant, frustra omnino es, dum totis viribus negativam probationem infirmare, atque elidere conaris. Pro auctoritate dumtaxat negante habere tu videris etiam *Anonymi* testimonium, dum ( pag. 37. ) ostensurum te esse promittis, illius *silentium nil tibi obesse*. Verum non silet *Anonymus*, sed eloquitur: non tacet, sed clamat, & disertissimis ille quidem verbis docet, Ingenuinum *PRIMUM* fuisse Sabionensium Antislitem. Omnem igitur Cassiano locum adimit; hic enim, si Episcopus Sabionensis fuit, ante Ingenuinum fuerit oportet. Quæ quidem positiva auctoritas, si cum negante *Prudentii* jungatur, adeo grave, adeo firmum, adeo invictum momentum contra sententiam tuam præbet, ut in hac materia, quæ sola propemodum auctorum

fide nititur, logicæ vero demonstrationis capax minime est, demonstrationis loco haberi possit.

Illud præterea ex hujus *Anonymi* testimonio evincitur, fontes nempe traditionum, & monumentorum Brixinensium, quæ nunc supersunt, ad Sæculum IX. & X. non pertingere; quod tu tamen (pag. 89.) citra hæsitacionem ullam statui posse arbitraris. Si enim inde eruta essent, eas opinioniones referrent, quæ tum maxime vigeant, hoc est nullum Cassianum Sabionensem Episcopum agnoscerent, Ingenuinum vero primum illius Ecclesiæ Antistitem cum *Anonymo* faterentur. Ex quo merito inferas, Brixinensium hodiernas traditiones multo recentiores esse, & post Sæculum demum XI. enatas, temporibus scilicet fabularum feracissimis, quibus vetera, & ab hominum memoria longe remota, pro suo quisque modulo metiebatur, credulisque lectoribus, qui omnia sine ullo prorsus delectu amplecterentur, libere venditabat.

III. Et sane quem testem Sabionensis Episcopatus Cassiani, tantopere a te propugnati, *Bartholomæo Tridentino* antiquiorem hæctenus tibi proferre licuit? Profer, si habes. Erubescis? Erubescas potius, quod Scriptorem qui Sæculo XIII. floruit, a me primum adductum, & refutatum; non modo

do *Patriæ nostræ decus*, quod tamen nemo tibi facile concesserit, sed etiam *testem omni exceptione maiorem*, si Diis placet, vocaveris (pag. 9. 100.) *quem viri* (continuo subdis) *ævo nostro doctissimi toties suis scriptis sine ulla reprehensione inserunt*. Inserunt illi quidem, Roschmanne, sed quum de iis agunt, ad quæ probanda alicujus ille momenti esse potest, ut sunt res ejusdem ævo gestæ: non autem ut primorum Ecclesiæ sæculorum facta confirmant; multo vero minus, ut eo auctore vetustiorum scriptorum fundamenta subvertant, quod ridendum utique foret. Inserui & ego, non ut sententiam tuam assererem, sed potius ut quam debili fundamento nitatur ea ratione declararem. Auctori qui, ut alia multa præteream, *Paullum Diaconum* Langobardorum Historiographum lippis & tonforibus notum, cum *S. Paullino* Nolano Episcopo confundit & qui Vallem *Anauniam*, vulgo nunc *Val di Non*, *Anoniam* vocari ait eo forte quod satis ibi abundet annona: qui *Atacem*, hoc est *Atagim* Rætix fluvium, vulgo *Aisacum*, ab *Athesi* fluvio Venetiæ non distinguit, etsi ejusdem Athesis accola: qui denique Gesta *S. Vigili* Tridentini Episcopi & Martyris *S. Hormisdæ* Papæ transmissa fuisse scribit, quamquam auctor sit, *Vigilium* passum esse *temporibus Theodosii*,  
O Ho-

¶ *Honorii sub Scilicone Consule*, Hormisda vero anno demum DXIV. Pontifex fuerit electus, hoc est integro post S. Vigiliæ necem Sæculo; Auctori, inquam, qui adeo frequenter, adeo turpiter, adeo pueriliter labitur in rebus aut domesticis, aut notissimis, absit ut multum tribuam (præsertim quod ad priora Ecclesiæ sæcula) nedum ut *Patriæ nostræ decus* appellem. Eodem loco illum apud Tridentinos suos haberi, vel illud argumento est, quod quum inter *Officia Propria* Sanctorum Ecclesiæ Tridentinæ olim *Lectiones* de S. Maxentia haberentur, ut ex *Calendario* jussu Christophori Madrutii Tridentini Episcopi a *Donato Fatio* Venetiis edito anno MDLX. compertum est; quæ *Lectiones*, ut collatione instituta didici, nihil aliud sunt, quam Sanctæ illius matronæ Vita a *Bartholomæo Tridentino* conscripta; eadem tandem sublata fuerint, neque amplius publice legantur; quod quidem, ut ex inferius dicendis palam erit, merito ac jure statutum fuit.

Ceterum quando testibus hujusmodi delectaris, immo antiquioribus eos præfers, en alium tibi offero (nam tecum liberaliter agere volo) nempe *Petrum Calo* Fossocloidiensem, qui licet integro Sæculo *Bartholomæo* nostro recentior sit, utpote qui  
Sæ-

Sæculi XIV. initio floruit, aliquanto tamen antiquior est *Petro de Natalibus*, qui eodem Sæculo inclinante vivebat. Is igitur in suis *Legendis*, quæ MSS. Venetiis asservantur in Bibliotheca SS. Joannis & Paulli, ita de S. Cassiano Martyre loquitur Cod. membr. 644. fol. 41. *S. Cassianus fuit spectabilis genere, sanctitate insignis, sapientia conspicuus, & in omni cultu divino devotus. Fidei autem in tantum relator extitit, tantusque defensor, tam ferventissimus idolatriæ expugnator, ut pro ipsius fidei amore mortem contemneret, & sæva supplicia rideret. Ne vero lucerna Dei sub modio absconderetur, & thesaurus tam inclutus occultaretur, & gemma tam fulgida latitaret, providentia divina in Episcopum primum Ecclesiæ Brixinensis electus est, quæ olim Salvonensis (lege Sabionensis) dicebatur, & venerabiliter consecratus. Ubi tanquam Pastor bonus, speculator assiduus, dispensator fidelis, populum sibi creditum instruebat doctrinis, convertibat miraculis, informabat exemplis. Sed quum sæva Paganorum rabies in Christi milites grassaretur, de Brixina, quæ est in Alamanniæ finibus, exire compulsus, quum Romam pergeret, ad Forum Syllæ, quod nunc Imola dicitur, & olim Cornelia vocabatur a Syl-la Cornelio potentissimo Romanorum. ejus*  
con-

conditore, Domino ducente pervenit: vel, ut dicit Frater Bartholomæus, captus illuc ducitur ab iniquis. Quare civitatem ingressus, cœpit rudem populum fidei rudimenta docere, & a nefandis simulacris incultos homines ad cultum reducere deitatis. Ut hoc opportunius impleret, Magistrum se professus est esse scholarum; utpote qui & divina scientia & Spiritu docente imbutus erat, & in humana nihilominus philosophia florebat. Traduntur igitur sibi pueri disciplinis scholasticis imbuendi, ut sic eos philosophia Christiana instrueret disciplinæ. Sed quia puerilis ætas effrenata nimis invenitur & lubrica, utpote quæ non coercetur sub imperio rationis, sed suæ impetum sequitur voluntatis, nisi ejusmodi magistræ censuræ compefcat; ideo Beatus Cassianus pueros, quos erudiendos susceperat, minis, & verberibus deterrebat, ut quod discere volebant spontanei, saltem discere cogerentur inviti. Quum igitur sic eos ad documenta salutis trahere nititur, eorum animus in Magistri odium concitatur, adeo ut eum apud parentes graviter accusarent, quod idola contemneret, & eos cultum alium edoceret. Inter hæc crudeles Tyranni promulgant sententiam, quod omnes Christiani aut Diis sacrificia offerant, aut supplicia acriora percurrant. Et ne adesset alicui excusationis facult-

### ❧ XIII ❧

cultas, jubent per omnes vicos & plateas simulacra statui, ne adeundi fieret difficultas: sacrificia omnis generis exhiberi, ne aut paupertas offerendi facultatem excluderet, aut defectus sacrificii sacrificium impediret: proponi dona & premia, ut cupiditas alliceret; ostendi supplicia & tormenta, ne aliquem impunitas demulceret. Mittuntur per provincias satellites edicta Principum iniquorum exsequentes; quibus in Imolensi civitate Beatus Cassianus oblatus est, mirè intrepidus, & fidei calore succensus, pro ea fortiter dimicare paratus. Qui interrogatus quis esset &c. Reliqua quibus Cassiani martyrium ex Prudentio, Petro Damiano, & Uuardo describitur, cum Christi passione comparatio instituitur, ac denique miracula ad Cassiani tumulum divinitus perpetrata recensentur, quum longiuscula sint, consulto prætermittimus. Si de hoc Auctore, qui ejusdem sacræ cum Bartholomæo Tridentino familiæ fuit, hoc est D. Dominici alumnus, plura scire cupis, adi Dissertationem meam *De Auctoribus ab Andrea Dandolo laudatis in Chronico Veneto* §. XIX. quæ *Rerum Italicarum* Tomo ultimo continetur.

IV. Verum quamquam probando Sabionensi S. Cassiani Episcopatu nulla tibi fundamenta suppetant, omnibusque solidis ac pri-



## XIV

primigeniis documentis destituto, aqua prorsus hæreat, nihilominus dici vix potest, quot in partes te verteris, ne victas dare manus cogereris. MSS. libros Chorales, ut vocant, Liturgicos, Breviaria, Calendaria, Lectiones, Orationes, Hymnos, Carmina, & sexcenta ejusmodi recentiora documenta, quotquot per universam Teriolim reperiri potuerunt, singula excussisti; quæ quum sincera, & antiquitati consona quod ad reliquorum Sanctorum, hujus præsertim Provinciæ, res gestas pertinet, tu repereris, inde recte colligere te posse putas (pag. 109.)

*Nullum Sanctum in his contineri, cujus Acta, utur modo deperdita, traditione tamen legitima ac firma continuata non fuerint a prima statim origine, atque hinc ea, quæ supersunt, instar reliquorum, indubia esse.*

Quod argumentum adeo urges, ut temerarium atque emotæ mentis eum voces, qui hanc tuam illationem calculo suo firmare nolit. At quid hoc aliud est, quam si ex eo, quod quis aliquando non erraverit, eum numquam errasse, aut errare potuisse concludas? Do tibi monumenta illa veritati, & antiquitati in reliquis penitus respondere, quamquam in multis inficiari id merito posset. Num ideo in nullo peccabunt? Quis certæ cognitionis privilegio ea donavit, constantisque veritatis Oraculum esse constituit?

Sed

Sed ad versus Leoninos etiam confugis,  
quod scilicet in aliquo Breviario hæc duo  
de S. Cassiano carmina offenderis :

*Vox Patris almirantia Christum docet in  
Sabiona :*

*Imula transfixum graphiis sic immolat  
ipsum.*

Contendis igitur, versus quos Leoninos vo-  
cant, non Sæculi XIII. setum, ut quibus-  
dam placuit, sed multo esse antiquiores,  
In ætate autem illorum designanda vix tibi  
constas. Pag. enim 101. cum V. Cl. *Scipio-  
ne Maffeo* Sæculo jam septimo, immo etiam  
sexto eosdem in usu fuisse, agnoscis. Pag.  
vero 139. *Ut quod res est ingenue fatear*  
(inquis) *non inveni Sæculo VIII. in autho-  
ribus, quos tum consulere potui, versus tam  
certe, ut vocant, Leoninos, ut extra con-  
troversiam etiam a Criticis ut tales proben-  
tur.* Continuo vero Sæculi IX. exempla sug-  
geris. At sub finem ejusdem Capituli ad Sæ-  
culum VIII. iterum redis, saltem quod ad  
duos a te allatos attinet, ais enim : *Haud  
difficulter mihi concedendum puto, hos quo-  
que versus Leoninos ad Sæculum VIII. cum  
reliquo Breviario pertinere, ad tempus nem-  
pe restauratæ per Theodonem II. Sedis Sabio-  
nenfis.* Verum octavo, septimo, aut etiam  
sexto Sæculo exorti sint versus Leonini,  
quid

quid hoc ad tuam causam? Si antiquitatem duorum a te modo allatorum statuere tibi animus erat, non modo quando cœperint Leonini versus, sed etiam quando desierint, probandum fuerat. Parum enim refert quocumque demum tempore exorti sint, quum tamen usque ad Sæculum XIII. & ultra vigerint (ut nullo negotio ostendere possem, nisi certis confirmandis tempus inutiliter terere piaculum mihi esset) proindeque duo illi eodem Sæculo XIII. aut proxime sequenti fundi potuerint, nisi certum eorumdem auctorem designes. Ne quid interim dicam, Sabionensis Ecclesiæ restorationem a Theodone II. factam, quam multis quidem verbis, nullo tamen probato teste pag. insuper 28. & 76. lectoribus tuis persuadere conaris, commentitiam prorsus esse censendam.

Postremo ad vulgi ineptias, & anicularum deliramenta etiam delaberis; ais enim (pag. 81.) *Monstratur adhuc hodie Sabionæ turris olim religiose culta, ubi ab infidelibus captus detinebatur S. Præsul: monstratur vestigium pedis rupi prodigiose impressum: quin etiam catenas ferreas, quibus vinctus in ergastulo delituit, olim non sine veneratione adfuisse ab idoneis testibus accepi.* Dolendum sane tibi est, catenas illas nunc haudquaquam adesse, iis enim & Bol-  
landi-

landianos, & me ipsum quoque durissime  
vinctos, in triumphum facile duceres. At  
non immerito ab ipsis forte Brixinensibus  
tandem contractæ sunt; constringendis enim  
colligandisque fabulis minus idoneas, licet  
fero, aliquando tamen ipsimet agnovere.  
Sed desine quæso, Roschmanne, antiqui-  
tatem Episcopatus Sabionensis S. Cassiani  
curiosius explorare, numquam enim eo quo  
velles, ascendes. Traditionem illam Sæcu-  
lo IX. recentiore esse compertissimum est;  
si enim aut ante, aut illo saltem Sæculo  
viguisset, *Anonymus*, qui ea ætate vive-  
bat, Ingenuinum *Primum* Sabionensem Epif-  
copum non pronuntiasset.

V. Verum Cap. XIII. tres, immo etiam  
quatuor ante Ingenuinum Sabionenses Epif-  
copos nactum te esse gloriaris. Quid? *Offi-  
cia Propria* Ecclesiæ Brixinensis *Lectio*  
IV. de S. Ingenuino hæc habent: *Ingenui-  
nus primus post S. Cassianum, temporibus  
Gregorii Magni, & Ruperti primi Salisbur-  
gensis Episcopi, circa annum Domini quin-  
gentesimum nonagesimum Sabionensem re-  
xit Ecclesiam.* Audin? Ecclesia Brixinensis  
nullum ante Ingenuinum Episcopum novit  
præter unum Cassianum: tu tres, aut qua-  
tuor fuisse contendis? Estne hoc illustrare,  
aut potius obscurare Ecclesiæ illius histo-  
riam? Quæ ex traditione, aut monumen-

## XVIII

tis supersunt veterum factorum reliquæ ; eas in illis *Officiis* nobis ipsa exhibuit. Si tu illas falsi arguis, ac prosternis, etiam Brixinensium traditiones & monumenta prosternis, dum pro illis vel maxime pugnare videris. Sed si te hanc in theatro fabulam agentem non sine indignatione tantum, verum etiam libenter audiunt, tibi favent, plauduntque Brixinenses ipsi, spectator ero & ipse, & quidem attentus & patiens ; neque enim est quod tum illi, tum ego a te quicquam timeamus. Speras tu quidem pluribus ante Ingenuinum in scenam productis Episcopis, totam, quæ *Anonymo* Mabilloniano inædificatur, fabricam facile evertere posse ; si enim Ingenuinus quartus, aut quintus sit, non primus Sabionæ Episcopus, & falsi evidenter arguitur Auctor ille, suus etiam Cassiano locus minime denegandus. Quam tamen ex voto tibi cesserit tuus hic ausus, paucis perpendamus.

Sabionensem Episcopum aliquem ante Ingenuinum colligere te posse putas ex his *S. Ambrosii* verbis Epist. LXIII. ad Ecclesiam Vercellensem, a me quoque allatis pag. 49. laudatæ Dissertationis: *Conficior dolore, quia Ecclesia Domini, quæ est in vobis, Sacerdotem adhuc non habet: ac sola nunc ex omnibus Liguriæ, Æmiliæ, Vene-*

*Venetiarumque, vel ceteris finitimis Italiae partibus, hujusmodi eget officio. Per partes Italiae finitimas Rætiam I. & II. intelligi posse autumas* (pag. 62.) atque inde infer, Sabionensem Ecclesiam, quæ sub Rætia II. continebatur, suo Pastore S. *Ambrosii* ætate minime caruisse. Equidem Cap. X. Rætiam utramque ad Italiam pertinuisse probaveras: nunc quod Italiam expresse non nominet Mediolanensis Antistes, sed *Italiae partes finitimas*, & tamen causæ tuæ patronum advocaveris, anceps quodammodo hæreere videris, & ad eandem partes Sabionam tuam remittis, quo scilicet ei Episcopum nanciscaris; sed frustra prorsus, & infelicitè. Per *partes Italiae finitimas*, Rætias intelligat *Ambrosius*, ut lubet, non repugno. Quid tum? Nullam in iis partibus Ecclesiam fuisse testatur S. Præsul, quæ Episcopum non haberet. Tu Sabionæ eo Sæculo Ecclesiam fuisse proba: tum ego libenter concesserim Episcopo eam non vacasse.

VI. Novum Sabionensem Præsulem extundere conaris (pag. 61.) ex his Schismaticorum Episcoporum (inter quos Ingenuinus) in Epistola ad Mauritium Imperatorem verbis: *Quod ante annos fieri cœperat: O in tribus Ecclesiis nostri Concilii, id est Beconensi, Tiburniensi, O Augusta-*

na, Galliarum Episcopi constituerant Sacerdotes. Per *Beconensem* enim Ecclesiam, seu *Brennensem*, ut alii legere malunt, *Sabionensem* commodè intelligi posse arbitraris, ex eo quod *Otto Frisingensis Brixinoræ in ipso Pyrenæo* (qui nunc *Brenner* mons est, a quo non longe abest *Sabiona*) sitam dixit. Vide quælo quo te disputationis æstus, atque intemperans *Sabionensis Ecclesiæ* quo jure quave injuria nobilitandæ libido, imprudentem abripuit. Cap. enim Quinto (pag. 16.) disertis verbis asseris: *Brixinam hanc nostram vix notam fuisse ante octavum sæculum*; quod deinde in *Addendis* §. II. (pag. 132.) latius explicas confirmasque. Nunc tui ipsius immemor, etiam sexto Sæculo notam facis. Si enim sub *Brennensi*, *Sabionensis Ecclesiæ* latitat, quid aliud est *Brennensis Ecclesiæ* in illa Epistola memorata, quam *Brixinensis*, exigua scilicet litterarum mutatione in *Brennensem* versa, quod idem *Brixinoræ Ottonis* in medium adducta, statuere te velle videris? Scilicet conjecturas conjecturis opponis, omnia susque deque habes, & incertus ac nutans, destruis tuum ipse, quod paullo ante construxeras. Qua ratione hæc sibi cohæreant, tu vide. Ego enim abs te quæro, si Ecclesiæ, quæ nunc *Brixinensis* dicitur, sexto Ecclesiæ Sæcu-

Sæculo *Sabionensis* vocabatur, ut certe vocabatur, quomodo eadem *Brennensis* dici poterat? Binomia igitur erat? At quo auctore id confirmas? *Si re ipsa* (verba tua sunt pag. 145.) *Ecclesia Veronensis unquam fuisset dicta Brennensis, id in Authoribus, Lapidibus, ac Tabulariis certe inuenisset Maffejus*. Id ipsum ego de te jure dixerim. Ingenuinus *Sabionensis* ab omnibus dicitur, numquam *Brennensis*; immo se ipsum in eo Supplici ad Mauritium Imperatorem Libello *Sanctæ Ecclesiæ Secundæ Rætiæ Episcopum* vocat. Cur non *Brennensem*, aut potius *Brennensium*, si quidem more ætate illa recepto, nomen te ipso iudice (pag. 159.) verisimile est a gente fuisse mutuatum?

At magno eruditionis apparatu nil propemodum intentatum relinquis §. IV. *Addendorum*, quo tandem Ecclesiam in Rætiis, quæ *Brennensis*, aut *Beconensis* appellaretur, Sæculi VI. initio extitisse evincas, quæ non alia dicenda sit quam *Sabionensis*. *Brenni*, *Breuni*, *Becuni*, *Briones*, aut *Breones* Rætiarum populi fuerunt, ut veterum scriptorum auctoritate probatur. Potuit igitur (ita tu ratiocinaris) ex iis denominari Ecclesia aliqua *Beconensis*, vel *Brennensis* in Rætiis. Sed Ecclesia *Sabionensis* in Rætiis est, ut nemo negaverit. Er-



go hæc potest esse Ecclesia illa *Brennenfis*, aut *Beconensis*, quæ a *Brennis*, vel *Becunis* originem trahere potuit. En unico prospectu stupendum illud ædificium, quod proprio ingenio a fundamentis excitare es aggressus. Et sane si quo nomine ante Sæculi VI. initium Sabionense oppidum appellabatur, nos lateret, integrum tibi profecto fuisset hariolari, atque inani illa pictura animum pascere: nunc quum contra sit, quid opus est verbis, ut Ecclesiæ nomen, quam inibi sitam fingis, conjectando divines? Certe *Antonini Itinerarium Sublavionem* notat; quo loco *sub Savione* primitus scriptum fuisse, recte *Cluverius* opinatur, atque oppidum illud est, quod postea *Sabio*, *Sabiona*, *Sebana* dictum fuit, vulgo nunc *Seben*. Idem nomen legere est in *Tabula Peutingeriana*. Porro *Antonini Itinerarium*, ut modo illud habemus, post Constantini Magni tempora absolutum fuisse, hoc est inclinante Sæculo IV. communis est doctorum virorum sententia. Eandem ferme ætatem redolet *Tabula Peutingeriana*, utpote quæ anno XV. imperii Theodosii Majoris, hoc est anno Æræ Vulgaris CCCXCIV. concinnata fuerit, ut viro doctissimo *Marco Velfero* adnotatum Epist. 5. ad *Josephum Scaligerum*; ex quibus dilucide patet, Sabionæ nomen jam inde

inde a Sæculo IV. inclaruiffe, quod deinde nomen ad finem ufque Sæculi VI. & multo etiam poft (ut tu ipfe, puto, non diffiteberis) perduravit. Nullus igitur locus reliquus fit *Beconenfi*, aut *Brennefi* Ecclefiæ Sæculi VI. initio; fed fi Ecclefia aliqua eo tempore Sabionæ conftituta fuit (quod tamen nufquam a te probatum) Sabionenfis certo certius vocabatur, non *Brennenfis*, aut *Beconenfis*.

VII. Neque vero eft, quod *Brixinam* in auxilium advoces, quo fcilicet periculum facias, num in *Beconenfem*, aut *Brennenfem* Ecclefiam illam transformari a te facilius poffit. Si enim Sabiona huic tuæ metamorphofi parum feliciter refpondit, novamque formam induere recusavit, subve-reor ne hæc fortius etiam refiftat. Certe *Brixinam* ante octavum Sæculum vix notam fuiſſe tu ipſemet faſſus es, & merito quidem ac jure. Anno enim DCCCXXVIII. oppidum, immo nec pagus fuiſſe videtur, quum *locus* dumtaxat dicatur: *ad locum*, quæ dicitur *Preſſena*, ut legere eſt in *Charta veteri* anno illo ſignata apud *Carolum Meichelbekium Hiſtoriæ Friſingenſis* Tom. I. Part. II. Num. 532. Anno DCCCCI. ut ex *Diplomate* a te ipſo (pag. 135.) al-lato, fit manifeſtum, *Curtis* appellabatur, quæ vox medio ævo ſonabat agreſtem quan-

dam habitationem ædificiis, colonis, servis, & latifundiis ad rem rusticam necessariis instructam. Tandem (*Matthæo Rader*o teste Tom. II. *Bavariæ Sanctæ* in Vita S. Lucani) sub Othone III. qui ab anno DCCCCLXXXIII. ad annum usque MIL. imperavit, moenibus cincta, oppidi nomen indepta est, quod tamen *Joannes Aventinus Annalium Bojorum* Lib. V. Cap. 6. num. 9. & *Wigulæus Hundius* in *Metropoli Salisburgensi* aliquanto serius factum fuisse tradunt, hoc est ab Hartwico Sabionensi Episcopo circa annum Æræ Vulgaris MXXXVIII. ex quibus omnibus Brixinæ ortus, atque ut ita dixerim infantia, & adolescentia prorsus pateſcunt. Nihil igitur ex eo nomine extundere potes, quo *Brennensem* Ecclesiam aliquam, ubi nunc Brixina est, olim fuisse comminiscaris, quum Brixina nondum ea tempestate orta esset. Quare *Beconensi*, aut *Brennensi* Ecclesiæ neque tu lucem aliquam præbere potes, neque illa tibi.

At inquires, nihil ne igitur conjecturis dandum? Dandum vel maxime, sed quum auctores, & documenta deficiunt: testibus autem, iisque locupletissimis occurrentibus, ex quibus validissimæ probationes deducuntur, conjecturas recedere necesse est, nisi Arti Criticæ nuntium omnino remittere velis.

velis. Ex *Antonini Itinerario*, & *Tabula Peutingeriana* luculenter discitur quo nomine antiquitus appellaretur Sabiona; ut quid igitur non acquiescis, ut quid nova nomina confingis, sollicitè investigans ac quærens quod jam inventum ac detectum, ante omnium ora oculosque versatur?

VIII. Verum enimvero quænam igitur est, & ubinam gentium statuenda *Beconensis* Ecclesia, a Schismaticis Episcopis in illo Supplici ad Mauritium Libello memorata? Si tu porro ita me interpellas, importune prorsus, & præter rem id facis. Quid enim si nodum hunc Gordium solvere minime possem? Num ideo concludendum esset, *Beconensem* Ecclesiam unam eandemque esse ac Sabionensem? Quænam fuerit, non assequuti sunt tot ante me doctissimi viri. Quid, si me quoque nescire fatear? Verum ne *Beconensis* Ecclesia tibi diutius animo obversetur, tandemque agnoscas nihil in ea perfugii a te statui posse, mentem tibi meam libentissime aperiam. Antequam tamen id facio, Schismaticorum verba ipsa audire præstat. Sed quia *Galliarum Archiepiscopi* (inquiunt illi) *vicini sunt, ad ipsorum sine dubio ordinationem accurrent, & dissolvetur Metropolitana Aquilejensis Ecclesia sub vestro imperio constituta, per quam Deo propitio Ecclesias*  
in

## XXVI

*in gentibus possidetis. Quod ante annos fieri cœperat: & in tribus Ecclesiis nostri Concilii, id est Beconensi, Tiburniensi, & Augustana Galliarum Episcopi constituerant Sacerdotes. Et nisi ejusdem tunc divæ memoriæ Justiniani Principis jussione commotio partium nostrarum remota fuisset, pro nostris iniquitatibus pæne omnes Ecclesias ad Aquilejensem Synodum pertinentes Galliarum Sacerdotes pervaserant. Factum id Justiniano imperante, quum nempe Alemanorum nationem a Gothis dimissam in suam potestatem redegerunt Franci, atque ultra etiam progressi, plures Italiæ Provincias occuparunt; qua de re ita Procopius Lib. IV. De Bello Gothico Cap. XXIV. Paulo ante Francorum Rex Theodebertus morbo obierat (quod accidit anno Æræ vulgaris DXLVII.) quum sibi nullo negotio tributaria fecisset nonnulla Liguriæ loca, Alpes Cottias, agrique Veneti partem maximam. Etenim Franci arrepta belli, quo Romani Gothique erant impliciti, opportunitate, sine discrimine ditionem suam us locis auxerunt, de quibus illi pugnabant. Venetorum pauca oppida Gothis supererant; nam Romani maritima, Franci cætera occuparant. Idem Cap. XXVI. auctor est, Narsete in Italiam anno DLI. misso, Agri Veneti loca tenuisse præfidiis Francos. Ex Agathia quoque*

que Lib. II. discimus, Leutharim Francorum exercitus ducem, *Pado transmissio, in Venetiam deflexisse, Cenetaque constitisse.* Inde intelligitur (ut recte monet V. Cl. Bernardus Maria de Rubeis Monumentorum Ecclesiæ Aquilejensis Cap. XXI. Num. 2.) cur Schismatici Episcopi dixerint: *Nisi divæ memoriæ Justiniani Principis jussione commotio partium nostrarum remota fuisset, pro nostris iniquitatibus pæne omnes Ecclesias ad Aquilejensem Synodum pertinentes Galliarum Sacerdotes pervaserant.* Quum enim Franci maximam Agri Veneti partem occuparent, periculum erat, ne ipsas quoque Venetiæ Ecclesias invaderent Galliarum Sacerdotes; quod tamen Francis inhibuit Justinianus, Norici, & Vindeliciæ possessione ipsis confirmata, ne ditionem ultra protenderent. Hinc patet, nulla nos necessitate cogi, ut *Beconensem* Ecclesiam in Rætiis statuamus. Potuit esse in Rætiis, potuit in Norico, potuit in ipsa Venetia, modo fuerit Metropolitæ Aquilejensi addicta, tres enim Ecclesias *sui Concilii* nominant Schismatici Aquilejenses, & nihil præterea addunt.

At quando in Rætiis eam figere tibi perplacet, do tibi Ecclesiam in Rætiis Aquilejensi subjectam, quæ *Beconensis* in Libello Supplici recensita potiori jure quam Sabinio-

tionensis, five quæcumque alla dici possit. Belunum, vulgo nunc *Cividal di Beluno*, vetus urbs est *Plinio*, & *Ptolæmo* memorata. *Ughellus*, *Cluverius*, *Cellarius*, aliique eam Rætiis accensent, immo postremi duo ubi in *Plinio* Lib. III. Cap. XIX. legitur: *Fertini*, *Tridentini*, *Berunenses* (al. *Berunenses*) *Rætica oppida*, Belunenses interpretantur, quibus consentit *Joannes Harduinus* in *Notis* ad laudatum *Plinii* locum. In ea urbe VI. Sæculo Ecclesiam constitutam fuisse, non est quod dubites. Laurentius enim Belunensis Episcopus ordine nonus, tum Synodo Marianensi a Schismaticis anno DXC. vel, ut aliis videtur, DLXXXVII. convocata; tum Supplici ad Mauritium Libello anno DXCI. dato, simul cum Ingenuino de Sabione subscripsit; ex quibus constat Aquilejensi Præsuli jam tum paruisse, eidemque parere etiamnum. Quam facile autem vox *Belunensis*, in *Becunensem*, aut *Beconensem* verti potuerit, nemo non videt, duarum scilicet litterarum, aut etiam unius dumtaxat mutatione. Hæc igitur dubio procul dicenda est *Beconensis* Ecclesia illa tantopere non modo a te, verum etiam ab aliis frustra quæsitæ; ut prorsus demirer tot doctissimos, atque in Ecclesiastica Italiæ Historia exercitatissimos viros, rem minime diffi-

difficilem non statim fuisse adsequutos. *Bollando*, qui Tom. I. Februarii in Actis S. Ingenuini, in *Brennis*, *Breunis*, aut *Breonibus* eam statui posse putat (ex cujus deinde fontibus hortulos tuos irrigasti) hincque *Breonensis*, *Breunensis*, sive *Brenensis* legendum esse judicat; recte *Pagius* in *Critica in Annales Baronii*, ad annum DXC. Num. 14. respondet: *Sed quum hic (Bollandus) non ostendat, horum populorum Urbem Episcopalem fuisse, hæc conjectura non admittenda*; cui tamen difficultati interpretatio mea minime subest. Opponi quidem posset, tres Ecclesias in Libello Supplici memoratas, hoc est *Beconensem*, *Tiburniensem*, & *Augustanam*; postquam ad Gallos Metropolitans transierant, non videri amplius Aquilejensi paruisse; proindeque *Belunensem*, quæ citra dubium Aquilejensi Episcopo subiciebatur, iis accenseri non debere. Sed ea animadversio, aut nil prorsus sententiæ meæ officit, quum reponi facile possit, aliquam saltem trium illarum Ecclesiarum ad pristinam Metropolim rediisse: aut si vim aliquam habet, ea certe contra te æque ac contra me pugnat, non minus enim *Sabionensis*, quam *Belunensis* Ecclesia anno DXCI. Aquilejensi parebat.

At *Bernardus de Rubeis Bollandi* conjectu-



jecturam amplexus est. Quid tum? Si exquisitoria fercula ei in promptu fuissent, lautiori convivio lectorem suum excepisset: jam quum nulla suppeterent alia, quæ habebat apposuit. Idem Cl. Vir. Cap. VI. Num. 7. laudati Operis *Hundii* sententiam refert, qui S. Cassianum primum Sabionæ Episcopum a Fortunatiano Aquilejensi Antistite initiatum fuisse affirmat anno circiter CCCL. Juliano vero Apostata imperante martyrio coronatum. At si *Prudentio* fides habenda, Cassianus Forocornelii passus est in sæva & generali Ecclesiæ persecutione, qualis post Constantini Magni tempora in Italia nulla fuit. Præterea idem *Prudentius*, qui anno *Æræ* vulgaris CCCXLVIII. jam natus erat, *vetusti temporis historiam* vocat Cassiani martyrium, quod profecto dicere non potuisset, si Juliano imperante, qui anno CCCLXIII. sublatuſ est, factum id esset, sua enim ipsius ætate res accidisset. Nihilominus non modo hæc non refellit Vir doctissimus, sed etiam *Baronii* objecta diluit; immo Cap. XX. Num. 3. ejusdem Operis inde arguit, Sabionensem jam a temporibus Fortunatiani Aquilejensi Præsuli paruisse. Sed cur non æque sibi diluenda proposuit argumenta *Antonii Croſini* primo Vicarii, tum Episcopi Brixinensis, qui magno ratio-

tionum pondere sententiam de Cassiani martyrio sub Juliano Apostata egregie evertit apud *Raderum* Vol. III. *Bavariae Sanctae* in Vita S. Cassiani? Scilicet non sua res agebatur: perfunctorie hæc attigit; neque scrupulosius discussit. Si advertisset quibus argumentis conficitur, Ingenuinum primum fuisse Sabionensis Ecclesiæ Antistitem, profecto eo quo est ingenii acumine præditus, neque Cassianum, neque alium in ea Sede ante Ingenuinum Episcopum admisisset.

Ceterum laude hic sua minime fraudandus *Marcus Hansizius*, qui Tom. I. *Germaniæ Sacrae* in *Prolegom.* Cap. XVII. Num. 5. hanc eandem quæstionem attigit, aitque: *Diserte nominant* (Aquilejenses Schismatici) *Ecclesiam Tibornensem, Becanensem, Augustanam, quarum prima indubitata est in Norico, reliquarum duarum interpretatio ambigua: in Norico tamen extitisse suspicio est, pro Beconensi enim videtur legendum Betovensis.* Quæ quidem *Betovensis* Ecclesia eodem auctore in *Corollaris* Num. 4. eadem est ac *Petoviensis*, seu *Petovionensis*, aliis *Petaviensis*, *Petabionensis*, cuius Episcopi *Victorinus* (in *Romano Martyrologio* IV. Non. Novembr. minus recte *Pictaviensis* appellatus) *Marcus*, & *Julianus Valens* in veteribus monumentis com-

memorantur. Quam facile enim P. littera ob soni ac formæ affinitatem pro B. ab amanuensibus accipiat, omnes norunt. Quæ sententia, licet postea docto Viro minus arriserit, eaque in iisdem *Corollariis* Num. I. revocata, *Bernensis*, seu *Beronensis* legendum esse conjecerit, ac Veronam intellexerit; tamen quum sit posteriore multo verosimilior, illi utique præferenda; *Petovium* enim Norico finitimam fuisse constat, immo Noricorum oppidis adscribunt *Itinerarium Hierosolymitanum*, circa postremos imperii Magni Constantini annos scriptum, *Ammianus Marcellinus* Lib. XIV. Cap. XXXVII. & *Zosimus* Lib. II. Cap. XI. ex emendatione *Reinesii*.

IX. Hæc quum ita sint, vide quæso, Roschmanne, quo jure scripseris (pag. 159.) *Nemini dubium hæere amplius posse, controversum hunc locum de sola Sabionensi Ecclesia explicari posse, imo. debere.* Quam tuam sententiam paullo post certam atque indubitatam pronuntias, immo addis contrarium aliquid ne vel somnari quidem posse. At si quod res est, libere fatendum, jucundissimo cuidam somnio mihi potius quam simillima videtur opinio tua, quam nulla prorsus ratione, nullo fundamento lectoribus tuis propinare contendis.

Ne-

Neque vero majoris momenti ea sunt, quæ postea subdis, hoc est solum tunc Sedis Sabionensis Præsulem Ingenuinum Rætiae Episcopum fuisse, qui ad Metropolim Aquilejensem pertineret. Soli Rætiae ad Francos delatæ, & eminenti eorum imperio tum adhuc subditæ, Ecclesiam Episcopalem non esse negandam. Postremo, Supplici Libello primum omnium subscripsisse Ingenuinum, quare eum propriam sedem habuisse necesse sit. Nam quod ad primum attinet, præterquam quod totum id, ut modo vidimus, manifeste falsum est, ut ex eo aliquid per te inferri posset, probandum tibi esset, *Beconensem* Ecclesiam nusquam omnino nisi in Rætia sitam esse potuisse; quod quibus demum monumentis, quibus tabulis unquam confirmabis? Ad secundum quod spectat, minime assequor cur Rætiis, etiamsi Francorum imperio subditis, necessario Episcopus sit tribuendus VI. Sæculi initio, quando tot illustriores Germaniæ civitates multo etiam post eodem caruerunt; immo in ipsa Italia Concordiensis, & Feltrensis Ecclesiæ (ut de aliis interim fileam) illa quidem Clarissimo, hæc autem Fontejo, qui ambo Ingenuini cœvi, ac Schismatis socii fuerunt, antiquiores Episcopos non agnoscunt. Tercio denique

C                      detur,

detur, Ingenuino propriam Sedem a nobis non denegari, Sabionæ enim Episcopum eum fuisse fatemur, licet ante illum nulum Sabionenſem Episcopum agnoſcamus. Vide, quæſo, num hæ tuæ probationes tanti ponderis ſint, ut jure ac merito iis tandem verbis potueris orationem concludere: *His, ut puto, non obiter aut perſuſorie monſtratis, majus adhuc aliquid audeo dicere, hoc nempe: quomodocumque ſcripſerit librarius, quomodocumque diſcordent exemplaria, aut eadem interpretati ſint Commentatores, conſideratis omnibus circumſtantiis, penſitatisque ad omnem criſin rationibus; alia quam Sabionenſis Eccleſia hic intelligi non poteſt.* Aquam contundis mihi crede, Roſchmanne, ſi pro tuo arbitrio, non ex Hiſtoriæ Criticæque Artis decretis de Eccleſiarum origine & antiquitate aliquid decernere audeſ.

X. At cominus congregeris, & Sabionenſem Episcopum ante Ingenuinum unum atque alterum non vagum illum quidem, & cujus nomen ignoretur, ſed certum ac designatum depromis, hoc eſt *MATURNI-  
NUM, & LUCANUM.* Fruſtra hætenus laboraſti; num feliciore ſucceſſu operam modo tuam impenderis, diſpiciamus.

Ex Synodi Gradenſis Aëtis anno Æræ Vulgaris DLXXIX. ut creditur celebratæ,

*Ma-*

*Maturninum* colligi posse confidis. Miserrimum perfugium! Ergo etiam monumenta supposititia & conficta in auxilium advocas, ut causæ tuæ patrocineris? Non probavi quod argumentis relictis, ad conjecturas diverteres: minus certe probaverim impostorum fraudibus auctoritatem quam habent nullam, a te modo maximam tribui. *Bernardo de Rubeis, Mansio, & Maffeo, si non conficta, saltem suspecta* videri Acta illa fateris (pag. 66.) At ego hic fidem candoremque tuum, Roschmanne, desidero; disertissimis enim verbis *Monumentorum Ecclesiæ Aquilejensis* Cap. XXVIII. Num. I. ait *Bernardus de Rubeis: Eadem Acta Synodi Gradensis, Epistolamque Pelagii II. ad Eliam datam paullo attentius expendenti, CONFICTA mihi videntur illa & SUPPOSITITIA*; & quod pluris est, adeo firmis rationibus, adeo invictis argumentis sententiam suam statuere pergit Vir doctissimus, ut commiseratione potius dignus videatur, qui in Actis illis ulterius tuendis oleum atque operam perdat. Quam in rem legi pariter meretur *Fratrū Bal-lariniorum de Patriarchatus Aquilejensis origine Dissertatio* Tom. IV. Operum Cardinalis *Norisi* pag. 1051.

Sed ne cui scrupulus aliquis hæreat, tibi-que omnino fiat satis, ponamus eadem

Acta sincera & genuina esse, simulque quid ex iis pro te elici possit, inquiramus. Integra & primigenia affert *Andreas Dandulus Rerum Italicarum* Tom. XII. & quidem, ut ipse ait, *ex authenticis & vetustissimis Codicibus* deprompta. Inter Episcopos, qui Synodo subscribere, legitur ibidem: *Martianus Presbyter locum faciens Viri Beatissimi Ingenuini Episcopi S. Ecclesiae Secundae Ratiæ. Agnellus Episcopus S. Ecclesiae Tridentinae superveniens his gestis subscripsi. Ferdinandus Ugbellus* Tom. V. *Italiae Sacrae* in Patriarchis Gradenfibus eorundem Actorum mentionem facit ex *vetusto Chronico*, quod *Gradense* dici solet, in quo tamen non integra dantur, sed Synodi dumtaxat historia affertur, ibique legere est: *Ingenius Episcopus Secundae Ratiæ, Agnellus Episcopus Tridentinus subscripserunt*. Scilicet Historiographo festinanti, quum ad Episcoporum subscriptiones, quæ multæ & variæ ibidem recensentur, ventum esset, satis fuit brevioribus verbis Episcoporum nomina enuntiare. Idem dicendum de Synodo Mantuana anno *Æræ Vulgaris DCCCXXVII.* celebrata, in qua ejusdem Gradenfis Synodi narratio inferitur; quare hoc tantum ibi legere est: *Materninus Sabionensis, Flaminius Tridentinus subscripserunt*; manifesto errore, & quidem dupli-

duplici, *Martianus* enim Presbyter, qui Ingenuini personam gessit, & *Materninus* perperam appellatur, omittendus erat, & ejus loco Ingenuinus ipse nominandus, pro ut recte factum in *Cronico Gradenfi*: deinde vero loco *Agnelli* Tridentini Episcopi, *Flaminius* obtruditur, qui ignotus prorsus Antistes est, neque a quoquam inter Tridentinos Præsules numeratur. Id minime mirum, nam Codicis scriptor, ex quo Mantuana illa Acta desumpta sunt, ita præfatur: *Descripfi, ut vides, confuse in Brunecca oppido Norico ejusdem Ecclesiæ Brixinensis anno MCCCCLX. ut monente Josepho Blanchinio Romani Oratorii Presbytero, ubi Codex adservatur, refert Bernardus de Rubeis laudati Operis cap. XLVII. Num. I.*

Porro quis credat ex hætenus allatis *Maturninum* aliquem Sabionensem Episcopum a te in scenam induci posse? Spem tamen omnem non abjicis. Acta Synodi Mantuanæ præ omnibus eligis, & quod ibi legatur *Materninus Sabionensis* (hoc est *Martianus* Presbyter, qui Ingenuini loco subscripsit, & errore librarii *Materninus* vocatur) inde *MATURNINUM* Sabionensem Episcopum confingis. Scilicet eadem perpetuo aberras chorda: ex lacunis omnia hauris; & quum fontes & flu-



mina præsto sint, aquam e pumice postulas. Perge porro: Jovem etiam ipsum ea ratione superaveris. Ipse enim ex proprio cerebro unam dumtaxat Minervam produxit: tu ex tuo multos nobis Episcopos educis. Quem setum ut foveas, ac inventioni interscias, mirum est quam multa comminiscaris; plures enim Codices Mantuanæ Synodi commemoras (pag. 68.) quorum alterum altero emendatiorem prenuntias: quando unicus tantum superest, hoc est Vallicellanus. *Apud Authores Synodum Gradensem impugnantes* (subdis pag. 66.) *controversum minime esse, has subscriptiones non referre veros illorum temporum Episcopos.* Quando nullus ipsorum (de Mansio non habeo quid dicam, ignotus enim mihi auctor est) id asserit: immo putant, si *Bernardum de Rubeis* excipias, qui ut Actorum confarcinatoris ingenium expendat, de solo Tiburniensi dubitationem ingerit) veros illorum temporum Episcopos referre, licet ea fide, qua ficta & supposititia nituntur; unde inconstantia, & lectionum diversitas repetenda. *Quam enim varia* (ut merito exclamat idem doctissimus Vir) *longeque diversa sunt, quæ pro genio excogitantur!..... Nec enim ut una veritas, ita unum mendacium est.*

At, inquis, si Ingenuinus, non vero alius,

alius, qui in Episcopatu eum præcesserit, Synodo Gradenſi anno DLXXIX. celebratæ interfuit, idemque, ut ex *Pagii* conjecturis colligitur, intra annos DCXXIV. & DCXXX. in exſilium fuit miſſus; ſediſſe eum ut minimum annos quinque ſupra quadraginta dicendum eſſet, *quod difficile omnino videtur*. Sed Acta Synodi Gradenſis (iterum dico) ſuppoſititia & conſicta ſunt. Noli eis fidere. Cauſſæ tuæ peſſime conſulis, ſi eam tenebrionibus & nugivendulis committis. Si quid abſurdi ex iis Actis ſequitur, id quod verum eſt, continuo in dubium ne revocare velis, ſed potius falſitatem illorum inde argue; luce enim tenebræ diſpelluntur, non lux tenebris.

Verum quando illa uti genuina, diſputationis gratia, hætenus conſideravimus, age porro eodem loco habere pergamus. Quod de tempore, quo Ingenuinus vivendi finem fecit, *Baronius*, *Bollandus*, & *Pagius* referunt, non certo aliquo auctorum teſtimonio probant, ſed ex conjecturis, iisque leviffimis, ne dicam falſis, ut infra videbimus, arguunt. Et ſane, ſi anno DXCI. Supplici ad Mauritium Imperatorem Libello primus ſubſcripſit, quod, ut videtur, plures in Episcopatu annos ageret, quam reliqui collegæ eidem Libello

subscripti; verosimile certe non fit, eundem ad annum usque DCXXXVIII. aut etiam DCXXIV. vitam produxisse. At fac scriptorum auctoritate, invictisque rationibus omnia firmata sint. Quid mirum, Inguinum supra quadraginta annos Sabionen- sem Sedem tenuisse? Nullane ejus rei exem- pla suppetunt cum in veteri, tum in re- centiore Ecclesiastica Historia? Immo obvia quam maxime sunt, & a nobis ne longius ea perquirantur, atque ab ipsa Brixinensi Ec- clesia non discedamus, postremus ejusdem Præsul, hoc est Gaspar Ignatius Comes Künigl, qui ante annos duos diem obiit extremum, quinque supra quadraginta an- nos eam feliciter gubernavit. Etiam pri- mis Ecclesiæ Sæculis si morum probitas, & doctrinæ præstantia id poscere videretur, juvenes aliquando ad Episcopatum adscisciebantur, quod S. Vigili Tridntini Episcopi exemplo confirmatur. Videsisquæ in hanc rem protuli §. XLIII. Dissertatio- nis de origine Ecclesiæ Tridentinæ, ne- que enim ea hic repetere animus est. Quod si quis vigesimum quintum exempli gratia, aut trigesimum ætatis annum agens eligatur Episcopus, quid mirum si etiam ultra quadraginta annos in Episcopali Se- de permaneat?

Neque vero ullius roboris est quod ad-  
dis

dis (pag. 68.) scilicet, si Synodi Graden-  
sis Actorum partem postremam ad Paulli-  
ni Aquilejensis Episcopi Conciliabulum an-  
no DLVII. convocatum, cum *Bernardo de*  
*Rubeis* pertinere dicamus, tunc utique  
etiam Episcoporum subscriptiones ad illud  
tempus pertinere dicendum esse, proinde-  
que Ingenuino septuaginta ferme Episco-  
patus annos tribui oportere. Ut enim tibi  
dem docti illius Viri conjecturam unde-  
quaue tutam ac firmam esse, evidentissi-  
mum tamen est ex ipsis Actorum verbis,  
subscriptiones illas non ad postremam, sed  
ad primam illorum partem referendas es-  
se; diserte enim in ea prima parte legi-  
tur: *Et reliquis Episcopis, & Sacerdotibus,*  
*quorum nomina subscriptiones propriæ ma-*  
*nifestant.*

Sed quisquiliis hujusmodi discutiendis  
diutius immorari nec vacat, nec lubet.  
Illud dumtaxat addiderim *Maturninum* il-  
lum tuum etiam domesticis documentis re-  
pugnare; nam si Ecclesiæ Sabionensi ante  
Ingenuinum præfuit, cur *Maturninus* al-  
ter, qui ab Ingenuino sextus est, & in  
Catalogis Sabionensium Episcoporum appa-  
ret, non appellatur *Maturninus Secundus*,  
sed simpliciter *Maturninus*? Repones for-  
tasse Catalogorum conditores primum il-  
lum *Maturninum* ignorasse. Sit ita. Non  
igi-

igitur, inquam ego, ex Sacris Diptychis, aut puriore aliquo fonte deducti sunt Catalogi illi, sed ad libidinem conficti; proindeque aut *Maturninum* Ingenuino antiquiorem repudies oportet, aut illo admisso, tota Catalogorum tuorum fides & auctoritas corrui, pro qua tamen tuenda manus identidem conferis.

XL. Quod ad alterum Sabionensem Episcopum a te assertum attinet, hoc est *Lucanum*, quem invitis Catalogis omnibus, una *Philippi Ferrarii* auctoritate nixus, invchere non erubescis (pag. 61.) mirari satis haud possum, Virum eruditione præstantem, & Arti Criticæ non insensum, qualem te cum in hac, tum in reliquis lucubrationibus tuis præstas, non pervidisse quam infirmum ac debile sit argumentum illud. Siccine ergo ad Critices Artis regulas, rectæque rationis normam antiquitatem exigis, ut rem primis Ecclesiæ sæculis gestam, fide Auctoris, qui nudius tertius floruit, inferioris subsellii, & qui non sine dubitatione loquitur, tanquam veram lectoribus tuis vendites? Quid, quæso, interest tali Auctore, & nullo omnino auctore loqui? Hæcne decent *indefessum antiquitatum Sabionensium scrutatorem*, quemadmodum in Epistola Nuncupatoria te ipsum appellas? Pudeat te prorsus Bollandianis

dianis viris doctissimis objecisse (pag. 1.)  
*Omni fere litterario apparatu sacro, & pro-*  
*fano, ac præcipue MSS. nostris Codicibus*  
*desituros esse.* Neque enim decet, in tan-  
 ta rerum inopia & mendicitate paupertatem  
 aliis te objectare.

Lucani Acta in Tabulariis Ecclesiæ Be-  
 lunensis, quæ Sancti ejusdem viri reliquias  
 servat, reperiri dicuntur. In iis vocatur  
 Episcopus *Brixinensis*, licet Cælestino I.  
 Summo Pontifice, hoc est V. Sæculo ine-  
 unte, floruerit, quum nempe nulla erat  
 Brixina. Præterea tradunt eadem Acta,  
 Lucanum a suis accusatum, ac propterea  
 Romam usque progressum, quum pallium  
 coram Pontifice ad Solis radios siccandum  
 suspendisset, non ab ullo illud clavo pe-  
 pendisse, sed iisdem radiis quasi paxillis  
 quibusdam fuisse sustentatum; quod idem  
 legere est de S. Florentio Argentoratensi  
 Episcopo apud *Laurentium Surium* Die VII.  
 Novembris. Ex quibus jure quis suspice-  
 tur, Acta illa a recentiore quopiam con-  
 sarcinatore fuisse conficta, qui quum ge-  
 nuinis documentis destitueretur, & tamen  
 aliquid litteris consignare percuperet, ali-  
 unde corrasit, quod narrationi infereret  
 suæ. Nihil olim pretermisere Bollandiani,  
 quo eadem Acta eruerent, at responsum  
 retulerunt: *Nihil prorsus extare in scriptis*  
*de*

*hæc vita S. Avatiæ, & S. Lucani: id solum constare, & dici posse, quod a populo fidei habeantur in veneratione, & colantur ut Sancti; quare hæc addunt Antuerpienses: Ferrarius citat monumenta Ecclesiæ Belunensis, quæ mirum est, ibi hodie amplius non superesse: an quod Belunenses ipsi satis perspiciant, pro genuinis admitti vix posse? Quid plura? Ferrario ipso iudice in iis Nonnulla continentur fabulis proxima, veluti, quod ursum, qui sibi in itinere equum devoraverat, Romam usque ad Pontificis conspectum equitaret; ac perdices, quibus in itinere præceperat, ut Romam convolarent, Pontifici donandæ, illæ ante Pontifici adfuerint. Ursi fabula etiam Romedio nostro, aliisque Sanctis Viris affingitur. Utut sit, Lucani Sanctitati nihil ego hic detractum volo. Illud dumtaxat contendo, si Ecclesiæ alicujus regimini præfuit, Sabionensem haudquaquam illam esse potuisse, quum ea tempestate nulla adhuc Sabionæ constituta fuerit Ecclesia.*

XII. Atque hæc ferme sunt, Roschmanne, quæ ut *Anonymi* Mabilloniani fidem atque auctoritatem elideres, & ante Ingenium non modo Cassianum, sed alios quoque Episcopos Sabionensi Sedi præfuisse ostenderes, a te excogitata fuerunt, quibus suffultus, temere a me (humanitatis tuæ

tuæ certe hac vice immemor) statutum fuisse contendis (pag. 59.) Ingenuinum primum fuisse Sabionensis Ecclesiæ Præsulem. Nunc vero te ipsum judicem appello, rogoque atque obtestor, ut attento animo, & a partium studiis alieno perpendas, uter nostrum rationem ducem rectius sit sequutus, uter ad veritatem propius accesserit, uter de ipsa Brixinensi Ecclesia magis meritis sit: an tu, qui falsis documentis, paralogismis, hariolationibus, fabulis illius dignitatem ac præstantiam tueri aggressus es: an ego, qui veterum scriptorum auctoritate, & argumentis (quantum materiæ ratio patitur) firmissimis munitus, quæ revera gesta sunt, eruere tentavi, quodque res ipsa fert, libere edixi.

Erroris argui *Anonymum* Mabillonianum ab ipsomet Cl. Editore his ejusdem verbis asseris: *In ordine Sabionensium Antistitum, vulgo Seben, quorum Sedes postea Brixinum migravit, ante Ingenuinum ponitur S. Cassianus; & post Ingenuinum undecim alii ante Mastulonem, qui in his versibus secundus est.* Sed falleris, Roschmanne. Sensum verborum *Mabillonii* aut non adsequutus es, aut te adsequutum non fuisse simulas. Non enim hæc ideo dixit, quod ullum in *Anonymo* errorem notare voluerit, sed quod ex eo castigandos esse dome-



domesticos Brixinensium Catalogos judicaverit. Patet id ex primis *Adnotationum* verbis, quæ ita habent: *Ex premissis versibus, quos Sæculo IX. scriptos fuisse constat, corrigendi sunt vulgati Indices Episcoporum Metropolis Saltzburgerensis.* Et sane eos Indices cum *Anonymi* versibus continuo confert doctissimus Editor, & primo quidem quinquam Episcopi ex Salisburgenſium Antistitum Elencho expungendi sint, diligenter adnotat: deinde ad Ratisponenses, & Frisingenses transit; atque iis excussis, tandem ad Sabionenses venit, & quid in iis pariter castigandum, quid expungendum sit, verbis modo a te allatis indicat. Illud idem repetit *Mabillonius* in *Annalibus* Tom. II. ad annum DCCXXXVIII. Num. 43. ubi hæc leguntur: *Hæc constant ex genuinis Indicibus a nobis editis, ex quibus vulgati emendandi sunt. Ceterum Sabionensis apud Noricos Episcopatus paullo serius erectus est, nec ei ullus proprius præfuit Episcopus ante Ingenuinum & Mastulonem. In his aliisque immane apparet apud Hundium discrimen.* Et ad annum DCCLXX. Num. 29. *Mendosus est apud Hundium, ut id in transcurso observem, primorum Sabionensium Episcoporum Index, quem ex pervetusto codice S. Emmerammi sic corrige: Et statim subjicit Anonymi versus de Episcopis*

## XLVII

pis Sabionensibus. Hocne igitur est *Anonymum* erroris arguere? Fidem iterum, & ingenuitatem tuam desidero; non modo enim hic, sed alibi etiam, nempe pag. 18. *Mabillonium* iis scriptoribus accenses, qui a partibus tuis stant, & id ipsum, quod *Hundius*, sensere.

XIII. Sane ad *Anonymi* illius vim & auctoritatem, quam habet maximam, infringendam nullum superesse effugium video, nisi quis obtendat, ejusdem ætate famam de Cassiani adventu Sabionam, & Ecclesiæ illius constitutione nullam prorsus viguisse, deperditis scilicet, aut latitantibus veteribus monumentis, quæ postmodum ex densissima antiquitatis caligine prospero successu tandem emerferint. At somniare verius, quam ratiocinari illum dixeris, qui eo perfugio utatur. Si enim ad veterum scriptorum fidem enervandam id cuique reponere liceat, nullum jam Historiæ caput, utut validissimis testibus firmatum, in tuto erit: nihil non fabularum adstruere nullo negotio quisque poterit, & vetustate conculcata, cujus honor & reverentia apud cordatos quosvis tanta perpetuo fuit, recentiorum inanibus commentis ac nugis palmam conferre.

Deinde vero quis sibi persuadeat, primum Institutorem, cujus nomen & fama  
altas

## ❧ XLVIII ❧

altas semper in hominum animis radices  
figere solet, e Brixinensium memoria pe-  
nitus excidisse; virique illius notitiam,  
qui novam religionis rationem, novam-  
que vivendi formam invexerat, quive a  
cæco, in quo tamdiu versati fuerant, Gen-  
tilitatis errore, Evangelii luce illata, tan-  
dem eos liberaverat, adeo consenuisse, ut  
universos propemodum lateret; ex quo  
præsertim ejusdem nomen ob fortiter tole-  
ratum pro Christi fide martyrium, adeo  
illustre, adeo celebre erat in tota Eccle-  
sia? Ecclesiarum exempla, quæ ut anti-  
quiorem originem jactarent, primos & ve-  
ros Antistites suos, fictis ac supposititiis  
recenter additis, nominibusque ingemina-  
tis, adeo misere confunderunt, ut impræ-  
sentiarum discerni neutiquam possint, ob-  
via quidem ac vulgatissima sunt: at Eccle-  
siæ exemplum, quæ non adeo multis ab  
exortu sæculis primum auctorem suum  
ignoraverit, vix certo aliquo, & ex pu-  
rioribus Ecclesiasticæ Historiæ fontibus hau-  
sto monumento, mihi quisquam probave-  
rit; quod scilicet sacrorum Diptychorum  
usus, qui antiquitus obtinebat, ingesta  
identidem solemniter veterum cujusque Ec-  
clesiæ Præfulum mentione, singulorumque  
nominibus ordine recensitis, illud vetaret;  
ex quibus Diptychis *Anonymum* Mabillon-  
nia-

## § XLIX

nianum cum Sabionensium, tum ceterorum Antistitum, quos suis canit versibus, nomina & ordinem didicisse, pro certo atque indubitato habendum.

Verumenimvero quo felici fidere, quibusve auspiciis luci tandem restituta fuit Cassiani simul ac Brixinensium gloria? Quis adeo fortunatus, ut ejusdem Sabionensem Episcopatum diuturnitate temporis ex hominum memoria deletum, vitæ de-  
nuo restituerit? Testem nullum *Bartholomæo Tridentino* antiquiorem occurrere, superius animadvertimus. Quæ sit scriptoris illius indoles, quantave auctoritas, itidem adnotatum. Facilitatis, qua in re Historica versatur (illudque ipsum de omnibus ferme ejusdem ævi auctoribus jure affirmaveris) luculentissimum specimen nobis præbet S. Maxentiæ D. Vigilii Tridentini Episcopi matris Vita, quam ab his ille verbis orditur: *Antiquorum sollertia pervigili studio multa memorabilia posteris in scriptis reliquit, quæ modernorum inertia vanitatibus Sæculi dedita, ex incuria amisit. Hinc est, quod multorum memorabilium Sanctorum gesta, aut semiplena, aut ex sola fama, seu etiam ex conjecturis vix possint haberi; & quorum nomina scripta sunt in cælis, eorum acta (non) scripta sint in terris, & memoria rarior habeatur.* Ex hac

D

præ-

prælocutione compertum fit, ingenuum hominem ingenue fateri, quod ad S. Maxentiae res gestas attinet, quas litteris consignandas susceperat, nihil plane ei suppetere. Quid igitur ageret? Receptum conjectandi morem & ipse continuo sequutus est, atque ita inquit. *Fuit igitur B. Maxentia temporibus Joviniani & Valentiniani I. Imperatorum præclaro Romanorum genere edita, & sicut nominis sui testatur consonantia, a Maxentio, quem paullo ante prædictos Prætoriani milites Imperatorem fecerant, Maxentia videtur denominata. Rixum teneatis amici? Ergo Maxentius Maximiani Herculii, qui Sirmii natus erat, filius, atque adeo natione Pannonius fuerat, Maxentiae præclaro Romanorum genere editæ nomen dedit? Ergo eundem Maxentium, qui anno CCCVI. a Prætorianis militibus Imperator fuit salutatus, paullo ante Maxentiae ortum Imperatorem factum fuisse discemus, quando hæc temporibus Joviniani & Valentiniani I. quorum postremus ante annum CCCLXIV. Imperator non est renunciatus, in lucem fuit edita? Hæc tamen Maxentia (ita prosequitur Bartholomæus) dicti Maxentii Sacriligos ritus abhorrens, orthodoxæ fidei cultum ferventissime tenebat, & ingenuo viro ejusdem fidei copulata, religiose Domino defer-*

## LI

*deserviebat.* At Vigili *Acta* Cap. I. Num. 2. disertis verbis testantur, S. illius Martyris parentes post suam demum in Tridentinum Episcopum electionem, *sui ipsius prædicatione cum suis germanis conversos* fuisse. Sed satis jam ineptiarum audivimus. Quo duce atque auctore *Bartholomæus* noster Sabionensem S. Cassiani Episcopatum invexerit, ex his facile quisque conjicere potest; nemo enim non videt, receptam vulgo opinionem, nullis idoneis vadibus, nullo probato documento subnixam, sed vel inde enatam, quod Cathedralis Ecclesia S. illi Martyri olim fuerit dicata, vel quacumque alia demum de causa exortam, ambabus, quod ajunt, ulnis excepisse; quam quidem popularem traditionem pro ut fidenter ab eo recepta fuerat, fidentius postea aliis venditavit. Præter eam nullus profecto divinus nuntius, nulla cælitus immissa lux adfuit, quæ rem oblivione sepultam atque obsoletam erueret, indicaretque.

XIV. Ceterum quæ de S. Cassiani generis nobilitate, Christianæ religionis in Rætiis prædicatione, & Episcopali dignitate a recentioribus commemorantur, seu potius comminiscuntur, cum veris & genuinis S. illius Martyris Actis, ejus vitæ ratione, ac ætate qua floruit, conciliari

nullo modo possunt. Quis enim animo concipiat, nedum certo sibi persuadeat, virum non modo nobilitate, sed etiam doctrina, & sanctitate conspicuum, qualem profecto fuisse oportet Evangelii Præconem, qui pro Christi fide extrema passus, tandem ab Ecclesia sua pulsus fuerat, proindeque amplissimo Confessoris titulo gloriari merito poterat; quis inquam animo concipiat, vilissimo ludimagistri munere, qui per signa & notas pueros scribere docet, vitam sustentare coactum fuisse? Tam igitur alte stertebat sive Mediolanensis, sive Romanus, sive quicumque alius Episcopus, a quo ad Alpes Ræticas missus fuerat, ut tot meritis insignem hominem, qui operam suam naviter alio collocare poterat, in tanta præsertim eorum penuria, qui nostræ religionis fundamenta contra Paganorum impetus jacerent, tanquam pistrino aliquo inclusum, otio torpescere lineret? Apage nugas.

Verum immortale facinus a Cassiano præstitum, si te audiamus, omnes latebat. Fidei, constantiæ, religionis illustria specimina ab eo inter Gentiles pro Christo edita, nulli patebant, ne popularibus quidem suis, immo ne illis, a quibus missus fuerat. Sed quis, quæso, hæc Lethæis undis immerserat: quis omnium oculis ve-

lum

lum obduxerat adeo spissum, ut ne Solem quidem cernerent; immo inquam quis virtutis naturam ipsam mutaverat, ut ea qua solet luce, minime coruscaret? Ne quid interim dicam, necesse plane fuisse, non modo quæ Cassianus egerat, sed ne Cassianum quidem ipsum de facie non novisse Forocornelienses, cives nempe concivem suum: aliqui stirpis saltem origo a tam vili & abjecto exercitio hominem subduxisset. Stomacho satis valido fuerit, qui hæc concoquat. Ego certe, ut quod sentio, libere dicam, quid tandem sit otio & litteris abuti, si hujusmodi portenta editis libris Lectoribus suis obtrudere non est, prorsus ignoro. Desiderium Episcopum redarguit *Magnus Gregorius Epistolarum Lib. IX. Ep. XLVIII.* quod *Grammaticam quibusdam exponeret*, hoc est, ut ego quidem interpreter, Poëtis enarrandis incumbere, nam id profecto, *Quintiliano* teste Lib. I. Cap. V. *De Institutione Oratoria*, Grammatici officium est. Quanto acrius in Episcopo reprehendisset Notarii professionem, quæ æque profana est ac Grammatica, multo vero infra illam sita, neque in tanto viro ferenda? Sane V. Cl. *Zegerus Bernardus Van Espen* in *Commentario ad Gratiani Decretum* Part. I. Dist. LXXXVI. in ea sententia est, ut putet

Chad.

D 3

Desi-



Desiderium a S. Gregorio Papa objurgatum fuisse, *Quod divino cantui immisceret hujusmodi profanas Grammaticorum fabulationes*. At se ipsum satis explicat Gregorius, & Desiderii facinus ob oculos ponit posterioribus ejusdem Epistolæ verbis: *Unde si post hoc evidenter ea quæ ad nos perlatæ sunt, falsa esse claruerint, nec vos nugis & secularibus litteris studere contigerit, Deo nostro gratias agemus, qui cor vestrum maculari blasphemis nefandorum (puta Jovis, qui a Poëtis canitur) laudibus non permiserit*. Ut prorsus demirer, Virum doctissimum id Desiderio huic affinxisse, quod de Catholico Episcopo quolibet futile plane esset ac ridiculum cogitare.

XV. Sed ut ad priora redeamus, quis præterea in Sabionensium Episcoporum serie adeo enormem lacunam admiserit, a Cassiano nempe ad Ingenuinum; hoc est trium Sæculorum, atque eo amplius, si ut tu verosimilius putas (pag. 90.) anno *Æræ Vulgaris CCLVII*. Cassianus martyrio sit coronatus? Nemo igitur postmodum Ecclesiæ a tam illustri Martyre constitutæ curam suscepit ullam, quo Christiana religio ibidem refloresceret. Quis credat rem Christianam integro ferme Sæculo ante Constantini Magni tempora, inter alpinas

pinas gentes, hoc est rudes, asperas, ignorantiae tenebris obvolutas, & idolis deditissimas, adeo feliciter crevisse, ut Ecclesia inibi erigi potuerit, cui Episcopus praeficeretur? Sane quænam fuerit harum regionum conditio etiam multo post, ex S. Vigilii nostri Actis manifestum fit; ex iis enim apparet IV. Ecclesiae Sæculo inclinante in ipsa Tridentina urbe nullam adhuc sacram ædem fuisse: in ipso vero Tridentino agro martyrio a Paganis affectos Sisinnium, Martyrium, & Alexandrum; quod paullo post ipsimet S. Vigilio obtigit. Quid, quod Brixiana Diocesis multum debet Vigilii nostri laboribus in Evangelio annuntiando, ut eadem Acta testantur?

Argumenta, quæ ex Patrum auctoritate ducis (pag. 43.) quo Rætiis Christianæ fidei lumen mature affulxisse probes, proindeque minime mirum videri debeat, in iis Ecclesiam a Cassiano institutam fuisse; confutationem utique nullam merentur; ludere enim potius in re gravi, quam serio aliquid probare voluisse videris. *Innocentius I.* Pontifex ait: *Manifestum est in omnem Italiam nullum instituisse Ecclesias, nisi eos, quos venerabilis Apostolus Petrus, aut ejus Successores, constituerint Sacerdotes.* Inde tu infer: *In omni igitur Italia jam*

*constitutæ erant Ecclesiæ, & Episcopi. Continuo vero subdis: In Rætia igitur, quæ ad Italiam tum certo pertinuit, pariter constitutæ fuisse, vix dubitare licebit. Egregia porro argumentatio, & quæ quantum in Dialecticis profeceris, una satis ostendat. De aliquo litterarum Magistro (utor verbis D. Augustini in Lib. De Prædestinatione Sanctorum Num. 14.) quæ in civitate solus est, dicimus, omnes iste hic litteras docet. Si inde quispiam inferret: ergo omnes discunt, nonne rideres? Ridet igitur argumentationem tuam, quæ huic quam simillima, immo una eademque est. Quemadmodum enim ex Augustini dicto recte quidem infertur, neminem discere nisi ab illo Magistro: perperam vero, omnes discere; ita ex Innocentii sententia argui sane potest, nullam in tota Italiâ Ecclesiam fuisse institutam, nisi ab Episcopis a Romanis Pontificibus initiatis: nequaquam vero per omnia Italiæ loca Ecclesias ab illis excitatas fuisse.*

XVI. Hactenus, ad explodendum Sabionensem Cassiani Episcopatum disputatis maximum, insuper ex eo robur accedit, quod Imolenses; ut liquet ex Anonymo auctore *Chronici Imolensis* apud Ughellum Tom. II. *Italiæ Sacræ* in Episcopis Imolensibus, in ea aliquando fuerint sententia,

tia, ut putarint, Cassianum e Sabiona Germania urbe Forumcornelii concessisse, ac deinde ad Pontificiam insulam a suis evertum: contra vero Brixinenses existiment e Forocornelii Sabionem missum, ibique Episcopum effectum. Quæ sententiarum discrepantia ac varietas traditionem utramque de illius Martyris Episcopatu prorsus evertit; perspicue id enim ostendit veteri eam probatoque teste caruisse, solaque vulgi opinione, quæ natura sua vaga ac mobilis est, fuisse subnixam. Fabulam tu quidem vocas eam *Chronici Imolensis* traditionem (pag. 19.) at si Imolenses illud idem de tua pronuntiarent, neutiquam video quæ ratione os iisdem obstrueres.

Neque spernenda omnino videtur esse *Matthiæ Burgklechneri* animadversio, quæ ex rariore cultu S. Cassiano a Teriolensibus præstito, ejusdem Evangelii in hac regione prædicationem, & Ecclesiæ constitutionem in dubium revocavit. Quis enim sibi fingat primo Pastori, primo Evangelii Præconi, rara adeo templa erecta fuisse? Si enim duo, aut tria excipias, nullum omnino in tota qua late patet amplissima hac Provincia videre est, præter Brixinensem: quum interim S. Vigilio Tridentino Episcopo, qui tamen primus non fuit, sexdecim omnino sacræ ædes in Terioli dicatæ

cata conspiciantur, quibus fortasse non paucae aliae addi possent.

Reponis (pag. 34.) hoc ideo factum, *Quia celebre erat ejus martyrium in tota Ecclesia, ejusque gesta Romam missa, a Summo Pontifice approbata, atque insignis per ea pars esset victoria*; quasi vero Casiani martyrium minus celebre fuerit in tota Ecclesia. Sed nonne Sisinnii, Martyrii, & Alexandri, qui a tot SS. Patribus summis laudibus efferruntur, martyrium aequale celebre, immo etiam celebrius erat martyrio Vigilii, & nihilominus quibus templis, si unum alterumve excipias, illorum memoria colitur? Contra S. Zeno Veronensis Episcopus, Martyr, ut videtur, minime fuit; & tamen quam late pateat ipsius cultus, quot templa non modo in Veronensi Dioecesi, sed per universam propemodum Italiam, & extra Italiam pariter, illi excitata fuerint, luculenter ostendunt ejusdem Operum docti atque eruditi editores *Petrus & Hieronymus fratres Balleirini in Prolegomenis Zenonianis Dissertatione III. Cap. IV. §. I.* Scilicet Anaunien- ses Clerici, quamquam Martyres, quia tamen non fuerunt primi Evangelii Prae- cones, non Episcopali, immo nec Presbyterali dignitate insigniti, sed Vigilii ipsius operarii, ab eo in Anauniam missi, illo-  
rum

rum gloria ipsi quodammodo cessit. Zeno autem Episcopus, & Vigilius tum Episcopus, tum etiam Martyr, ambo autem, licet non omnino primi Evangelii præcones, quia tamen hic Tridentinam, ille Veronensem urbem universam ad Christianam religionem converterunt, eam nominis, & cultus celebritatem nacti sunt. Porro quod quispiam primus in aliquam regionem Evangelii lumen inferat, Ecclesiam ibi constituat, Episcopali dignitate condecoretur, postremo etiam martyrii palmam adipiscatur, & tamen adeo raro atque exili cultu a suis honoretur, mirum, ne dicam prodigiosum videri merito debet.

Quæ subdis Sanctorum celeberrimorum exempla, qui tamen ampliori cultu non gaudent, ut laudatorum Martyrum Ananienfium, S. Prosdocimi, S. Lucii, S. Romedii, S. Lucani Sabionensis, & B. Hartmanni Brixinensis Episcopi; minus apposita sunt, neque enim singuli adeo celebres fuere, ut tu nimis asseveranter affirmas, quum illorum aliquis obscurissimus etiam sit: nullus autem iis prærogativis insignitur, quibus Cassianus, si quidem præter martyrium, de quo nemo disputat, etiam Episcopi, & primi Evangelii Præconis munere gloriari posset.

Neque vero sola cultus raritas est, quæ

Cas-

Cassiani Episcopatum & prædicationem suspectam faciant, sed illud insuper animadversione dignum; cultum eidem præstitum non adeo antiquum esse, si quidem, ut tu (pag. 28: 76.) conjicis, ipsa Sabionensi Ecclesia, Theodone II. Duce Bolis imperante, S. Cassiano fuerit dicata; Theodo quippe ille, ut *Marco Hansizio* Tom. II. *Germaniæ Sacræ* pag. 59. Num. 52. adnotatum, post annum demum DCCXVIII. diem obiit. Primo igitur Sabionensium Pastori, primo Episcopo, primo Ecclesiæ conditori tam sero a suis publicus cultus exhibitus, tam sero sacra ædes erecta? Tanti igitur beneficii parum adeo memorem dicemus Sabionensem Ecclesiam, ut insignem hunc suum Patronum, tot nominibus colendum, ingratissime tamdiu neglexerit?

Quod addis de S. Vigili Tridentini Gestis, ea scilicet Summi Pontificis auctoritate roborata, atque inde insignem partem fuisse victoriam, ex quo nominis illius celebritatem repetendam esse contendis; mones totum id sublestæ fidei esse, utpote erutum ex auctario, quod S. illius Episcopi Actis additum fuit; cui panno temere ab interpolatoribus afflato, tam longe abest, ut Vigili gloria accepta referri debeat, quin potius veris & genuinis S. ejusdem  
Mar-

Martyris Actis non parum eum officere exploratissimum sit. Audi V. Cl. quem merito maximè facis, *Scipionem Maffejum Veronæ Illustratæ* Part. I. Lib. VIII. pag. 213. Negli Atti di S. Vigilio, benchè impa-  
 striciati di giunte, e però di poca autori-  
 tà, si legge &c. Quod tamen ante ipsum monuerat Daniel Papebrochius, cujus in suo ad ea Acta Commentario Prævio hoc de iis est judicium: *Itaque his omissis, sola prima damus, si non omnino primigenia, tamen (excipiendo quædam sub finem addita, vel mutata, & priores fortassis lineas) primigeniis proxima.* Vide ejusdem Papebrochii in ea Adnotationes.

XVII. Dixi superius Brixinensium monumenta, quibus Sabionensis Ecclesiæ historia continetur, non adeo sincera & antiquitati consona videri; quin, si ad examen revocentur, in contrariam potius sententiam, saltem quod ad partem ipsorum aliquam pertinet, pedibus manibusque eundem sit. Id ne gratis a me assertum fuisse putes, simulque ne cuiquam mirum videatur, Brixinenses Patriæ suæ decus uberior amplificare quam veritas fert; juvat nunc Ingenuini, quod alterum est Ecclesiæ Sabionensis lumen, Acta paullisper expendere, quo scilicet judicium ferre liceat, num & huic forte plus tribuatur quam



quam veterum auctoritas, & ratio ipsa postulat.

Prima, quæ hujus Episcopi occurrat mentio, est in supplici Libello a Schismaticis Aquilejæ Episcopis Mauritio Imperatori oblato anno *Æræ* Vulgaris DXCI. ubi inter Episcoporum subscriptiones, & quidem primo loco, legere est: *Ingenuinus Episcopus S. Ecclesiæ Secundæ Ratiæ*. Ejusdem viri meminit *Paullus Diaconus* Lib. III. Cap. XXVII. de *Gestis Langobardorum* recensens nomina Schismaticorum Præsulorum, qui Marianensi Conciliabulo interfuerunt anno DXC. vel DLXXXVII. ut *Bernardo de Rubeis* visum est; quod repetit *Diaconus* in *Appendice ad Eutropium* Lib. XVIII. Postremo idem Auctor Lib. III. Cap. XXXII. De *Gestis Langobardorum* Ingenuini facinus refert, qui una cum Agnello Tridentino Episcopo magnam pecuniæ vim contulit, ut castri cujusdam ciues, quos Franci Mauritio imperante captivos abduxerant, in libertatem assereret, redimeretque. Nihil præterea de hujus Episcopi gestis ad nos transmisit antiquitas. Num a Schismate tandem recesserit: ubi, quando, & quo mortis genere obierit, silent veteres scriptores ad unum omnes; adeo ut si ex iis, quæ memoriæ prodita sunt, de eo-judicium ferendum sit,

fit, in schismate mortuum prout in schismate vixerat, statuendum plane videatur.

At obstat cultus, quem in Brixinenſi Eccleſia jamdiu obtinuit, & *Martyrologii Romani* auctoritas, in quo una cum Albuino Brixinenſi Epifcopo Sanctorum factis adſcribitur. Ingerit igitur ſeſe hic nobis V. Cl. *Joannes Bollandus*, qui ad Diem V. Februarii ejusdem res geſtas expendit, aitque fieri omnino potuiſſe, ut veritati tandem manus dederit, *Maxime poſtquam Theodelinda Regina, primum in partes deſenſorum trium Capitulorum perducta, deinde ſtudio S. Gregorii ad communionem Catholicorum erat revocata; cum eſſet ceteroqui vir bonus, & miſericordiæ operibus deditus.*

At quid commune Theodelindæ Langobardorum Reginæ cum Ingenuino fuit, cujus Diœceſis Langobardorum imperio minime parebat? Liceat id conjectare de Venetiæ Epifcopis, qui ſubjectas Theodelindæ Diœceſes regebant, non de iis, qui ab illius dominio diſſociabantur. Immo ne Venetorum quidem Præſulum aliquem S. Gregorio vivente Apoſtolicæ Sedi caput ſubmiſiſſe conſtat. *Sed unanimis elegiſſe Candidianum Provinciales Epifcopos omnes* (ait Monumentorum Eccleſiæ Aquilejenſis doctiſſimus illuſtrator *Bernardus Maria de Ru-*

Rubeis Cap. XXXIII. Num. 2.) *difficile dictu, cum illorum neminem, qui debebant in Langobardorum ditone, a Schismate hoc tempore (anno DCVI. altero post D. Gregorii mortem anno) revocatum sciamus. Quatuor ut summum Episcopos Istriae, Schismate deposito, ad unitatem Ecclesiae venisse, colligimus ex Epistolis Gregorii Magni, Petrum, Providentium, Firminum, & illum qui propria sedere relicta, in Sicilia paribus debebat. Quod si Episcopi, qui Principi parebant ab errore jam revocato, & qui eos ad Ecclesiae unitatem compulisse, aut saltem adhortasse verosimillimum est, errorem tamen non deposuerunt; quid quæso sperandum de iis, qui Principe non reclamante, in sua sententia consistere sinebantur?*

Verum enimvero si cultus memorati nulla alia, eaque longe verosimilior, afferri posset origo, integrum profecto cuique esset huiusmodi conjecturis, quamquam nullius pane roboris, aliquid tamen dare. Nunc quum aliud quoque in causa esse potuerit, cur Ingenuinus tanquam Sanctus, licet nullo suo merito, & habitus olim sit, & habeatur etiamnum, *Bollandi* sententiae prorsus valedicendum esse arbitror. Id ut planum fiat, altius aliquantò (breviter tamen) res est repetenda.

XVIII. Scitum est apud Historiæ Ecclesiasticæ studiosos, Vigilium Romanum Pontificem, qui anno DXL. electus fuit, emissio ab Imperatore Justiniano contra *Tria Capitula* edicto vehementer restitisse, quod, illis damnatis, auctoritatem Concilii Calchedonensis labefactari judicaret. Exinde remelius discussa, quum cognovisset salva Concilii illius reverentia *Tria Capitula* damnari posse, damnavit illa, simulque ad Mennam Constantinopolitanum Præfulem *Judicatum* misit adjecta hac clausula: *Salva in omnibus reverentia Synodi Calchedonensis*. Ea res totum propemodum Occidentem in eum, quasi Synodi illius violatorem concitavit, adeo ut Africani Antistites a Catholica communione eundem excluderent. Pontifex ut turbas has compesceret, *Judicatum* suum sibi restitui curavit, & quæstionem omnem de *Tribus Capitulis* usque ad Concilium sub anathematis pœna interdixit. Interea Justinianus, qui Ecclesiæ negotiis libentissime sese immiscebat, novum contra *Tria Capitula* editum emisit, & Constantinopoli anno DLIII. Synodum indixit Universalem, in qua *Tria Capitula*, id est *Theodorus impius Mopsvestenus cum nefandis ejus conscriptis*, & *quæ impie Theodoretus conscripsit*, & *impia epistola, quæ dicitur Iba*,  
E                      & de-

¶ *defensores eorum* damnati sunt. Huic Synodo (cujus celebrationi Vigilius ipse alioqui consenserat) non modo interesse noluit Pontifex, sed etiam edito *Constitutio*, negavit *Tria Capitula* damnari posse, Conciliique, a quo damnata fuerant, decreta diu reprobavit; donec tandem studio veritatis mutata sententia, *Constitutum* pro *Tribus Capitulis* abrogavit, & Synodum confirmavit auctoritate sua, quæ Synodus Concilium Œcumenicum V. Constantinopolitanum vero II. appellatur.

His peractis Catholici per Orbem Episcopi quamplures, quibus Vigiliæ acta non probabantur, & quæ a prudentia maturoque consilio profecta fuerant, inconstantia & levitati tribuebant, non modo summo Ecclesiæ Magistro ac moderatori obedientiam præstare detrectarunt, sed caput etiam contra eundem attollere non sunt veriti, & *Tria Capitula* acerrime defendere, eo obtentu, quod citra Calchedonensis Synodi injuriam damnari illa haud possent. Horum omnium pervicacissimi fuere Aquilejensis Ecclesiæ Suffraganei, hoc est Rætiæ, Norici, Istriæ, & Venetiæ Episcopi, qui schismate facto, diu multumque cum suo Metropolita a Romanæ Ecclesiæ communionem sejuncti, illud soverunt. Unitatem primus dissolvit Macedonius Aquilejensis Episcopus.

## ❧ LXVII ❧

Episcopus, cui Paullinus, & Probinus schismatici ordine successere. Probinum excepit Elias, non modo schismaticus ipse, verum etiam schismaticorum dux obfirmatissimus, quem Pelagius II. Summus Pontifex, quum paterna lenitate nihil proficere animadverteret, vi compellere decrevit, ut una cum refractariis Episcopis ad officium rediret, Smaragdi Ravennæ Exarchi opera ad hoc usus, qui terrore ac minis eos insequi non destitit. Elia defuncto, Aquilejensis Ecclesiæ regimen suscepit Severus, qui decessorum vestigiis insistens, unitate & ipse discissa, Matri Ecclesiæ obtemperare abnuebat. Smaragdus igitur, quum Istriæ urbes inviseret, ad Gradum classem appulit, Severum in Ecclesia cepit, & injuriis affectum, Ravennam cum tribus aliis Episcopis perduxit, ubi coram Joanne Archiepiscopo Ravennate, eum *Tria Capitula* damnare coegit. At Severus paullo post ad suos reversus, non modo in pristinum schisma est relapsus, revocata in Marianensi Conventiculo a schismaticis coacto, quam cum Ravennate Episcopo inierat, communione, verum etiam tres ad Mauritium Imperatorem contra S. Gregorium Magnum Summum Pontificem Libellos misit, ac demum in schismate obiit; quod quidem schisma multos adhuc post

E 2                      annos

annos perduravit, donec modo his, modo illis Suffraganeis Aquilejæ Episcopis ad Romanam Ecclesiam accedentibus, tandem & ipse Metropoli agnito diuturno decessorum errore V. Œcumenicam Synodum recepit, & schismate ejurato ad Catholicæ Ecclesiæ unitatem rediit.

XIX. Ex hætenus dictis liquet, antequam eadem V. Synodus *Tria Capitula* damnasset, & Vigilius Summus Pontifex calculo suo damnationem illa ratam fecisset, *Tria Capitula defendere*, idem omnino fuisse ac cum Ecclesia Catholica Romanoque Pontifice sentire: verum post latam contra *Tria Capitula* cum ab Œcumenica Synodo, tum a Summo Pontifice sententiam, eadem condemnare nolle, temerarium quidem fuit: at a condemnantibus communione divelli, etiam schismaticum.

Porro in historia V. Synodi, ac Schismatis Aquilejensis (quæ revera variis diffidiis & vicissitudinibus implicatur) penitus cognoscenda, mirum est quot illustres magnoque nomine viri cæspitaverint. *Andreas Dandulus* doctissimus Venetorum Dux in *Chronico Veneto*, quod *Rerum Italicarum* Tom. XII. V. Cl. *Ludovicus Antonius Muratorius* edidit, ita scribit: *Hoc tempore Schisma maximum in Venetia, & Liguria,*

## § LXIX §

ria, & Istria exortum est. Quia Macedonius Aquilejensis Episcopus, & Honoratus Mediolanensis, & Joannes Ravennas Episcopi cum suis Suffraganeis Tria Capitula Calchedonensis Synodi, quæ in Concilio nuper Constantinopoli peracto comprobata fuerant, confiteri, & recipere volebant. At V. Synodus proscripsit, non comprobavit Tria Capitula Concilii Calchedonensis; neque Schismaticorum crimen in eo positum erat, quod illa confiteri, & recipere nollent, sed quod spreta Romanæ Sedis auctoritate, damnare recusarent. Idem Auctor Eliam Schismaticorum Aquilejensium pessimum, Venerabilem Episcopum vocat.

V. Cl. Henricus Norisus Cardinalis Cap. IX. §. IV. Dissertationis Historiæ de Synodo V. testis est, Urini in Patriarchali Aula hoc elogium Severo Schismatico inscriptum legi: Severus.... Ravennam injuriose ductus coactusque Manichæis assentire, a Gregorio I. Papa ad catholicam veritatem redire revocatus, quam in Episcoporum provinciali Synodo publice professus, sancte vixit, obiitque. Verum quum Ravennam a Smaragdo injuriose ductus fuit Severus, non Manichæis, sed Catholicæ Ecclesiæ assentiri fuit coactus, scilicet Tria Capitula damnando, quod ipse cum collegis Schismaticis renuebat; neque in Provinciali



Synodo, hoc est Marianensi, Catholicam veritatem est professus, sed initam cum Joanne Ravennate Catholico Episcopo communionem revocare a Schismaticis compulsus fuit; multo vero minus *Sancte vixit obiitque*, qui Schismaticorum signifer fuit; qui non modo ipse ab Ecclesie unione abhorruit, sed & Firminum Episcopum Tergestinum præmiis ad Schisma pellexit, & recusantem diris modis afflixit; qui contra S. Gregorium Magnum semper stetit, ejusque pia vota datis ad Mauritium Imperatorem litteris temere elusit; uno verbo qui pertinax in quo vixerat Schismate, tandem mortuus est. Quare apposite jam laudatus Cl. Vir hoc epiphonemate narrationem claudit: *Ita & muri suas fabulas cantant.*

Nihilo tamen secius eandem fabulam recinunt *Onuphrius Panvinus* Lib. V. *Antiquitatum Veronensium* Cap. IX. *Joannes Candidus Antiq. Aquilejens.* Lib. III. *Wiguleus Hundius* in *Metropoli Salisburgensi*, *Hieronymus Rubeus* Lib. IV. *Histor. Ravennat.* eosque sequuti recentiores *Palladius* Lib. I. *Histor. Foro-Julienf.* & *Ughellus* Tom. V. *Italiae Sacrae* in tabulis Patriarcharum Aquilejensium, & alibi sæpius, qui scribunt Severum Ravennæ Joanne Episcopo cogente Manichæorum hæresi nomen dedisse; atque ita amplissimum Antistitem, cui

S. Gre-

*S. Gregorius Magnus* libros *De cura Pastoralis* dicavit, ac tot litteras dedit, cujusque mortis se vehementer indoluisse testatur Lib. 4. Epist. XXIII. turpissimo crimine infamant.

In eadem Utinenſi Aula de Elia Aquilejenſi Episcopo Schismatico idem propemodum fingi *Norſus* auctor est; legitur enim ibidem in Manichæorum illum hæresim dilapsum, Pelagii Papæ litteris revocatum fuisse; quæ fabula ad rerum Forojuliensium Scriptores, laudatum *Ugbellum*, aliosque deinde promanavit.

Sed in historia Schismatis Aquilejenſis enarranda nemo turpius alucinatus est *Paulo Diacono* Langobardorum Historiographo insigni, qui eam adeo pervertit, ut Schismatis illius indolem ac rationem penitus ignorasse videatur. Primo enim de Pelagio II. Romano Pontifice Lib. III. Cap. XX. *De Gestis Langobardorum* ait: *Hic Pelagius Eliæ Aquilejenſi Episcopo nolenti Tria Capitula Calchedonensis Synodi suscipere, epistolam satis utilem misit, quam B. Gregorius, quum esset adhuc Diaconus, conscripſit.* Immo vero *Tria Capitula* rejicere ac damnare nolebat Elias, & quod deterius est, se a recipientibus & damnantibus communione separaverat, quod summopere Pelagio displicebat, atque ob id memoratam eidem Epistolam scripsit. Idem *Paul-*

*Ius* Lib. III. Cap. XXVII. auctor est, Severum Aquilejensem Episcopum a Smaragdo compulsum fuisse *Communicare Joanni Ravennati Episcopo Trium Capitulorum damnatori, qui tempore Pape Vigilii vel Pelagii a Romanæ Ecclesiæ descriverat societate, & paucis interjectis ait: Smaragdum Patricium a Dæmonio non injuste correptum, Constantinopolim remeasse. Qua ratione Catholicum Episcopum, & Catholicæ fidei vindicem, Schismaticum facit: Smaragdum vero Exarchum Schismaticorum hostem acerrimum, qui Apostolicæ Sedi strenuam semper navaverat operam, non injuste a Dæmone arreptum fuisse tradit. Sed lineas omnes prætergreditur Diaconus, quum laudato loco hæc continuo addit: Post hæc facta est Synodus decem Episcoporum in Mariano, ubi receperunt Severum Patriarcham Aquilejensem, dantem libellum erroris sui, quia Trium Capitulorum damnatoribus communicaverat Ravennæ. Nomina vero Episcoporum, qui se ab hoc Schismate cohibuerunt, hæc sunt &c.* Scilicet errorem vocat ad Matris Ecclesiæ gremium rediisse, & ab errore fuisse revocatum: a Schismate autem puros, & vere Catholicos facit decem illos Episcopos, qui ut Schisma foverent, atque ad id Severum compellerent, Marianense Conciliabulum convoca-

ve-

verant. Præterea *Paullus* Lib. II. Cap. X. Paullinum Aquilejensem Episcopum *Beati* titulo insignit, qui Paullinus infandi Schismatis princeps fuit, Synodum Provincialem coegerat, ut de V. Universali Synodo, spreta Romanæ Sedis auctoritate, judicium ferret, & a Pelagio Summo Pontifice dictus est *in schismate maledictus*. *Fratres Ballerini* in *Dissertatione De Patriarchatus Aquilejensis origine* Tom. 4. Operum Cardinalis Norisii pag. 1066. *Paullo* Diacono insuper vitio vertunt, quod *Candidianum* Episcopum Gradensem Catholicum, ex Schismaticorum locutione Schismaticum vocaverit: O Severum, quum *Ravennæ* Catholicis adhæsit, *Manichæis* accensuerit. Quæ duo tamen nullibi apud eum Auctorem expresse legas.

*Henrico Norisio Joannem* etiam *Diaconum*, qui S. Gregorii Magni res gestas literis consignavit, perperam Aquilejensis Schismatis historiam repræsentasse visum est, quum Lib. III. Cap. I. de S. illo Pontifice scripsit: *Jam Ligures, Veneros, Hibernos, aliosque a schismate sub Libello confessos Calchedonensem Synodum venerari compellens ad unitatem S. Ecclesiæ revocarat*. Errat: (subdit Norisius Cap. IX. §. V. laudatæ Dissertationis) dum asserit schismaticos Gregorio compellente Synodum Calchedo-

*donensem veneratos esse, quum illi ob præ-*  
*tensam venerationem erga Synodum Calche-*  
*donensem Gregorio, uti diximus, contradi-*  
*cerent. Quod idem repetit Bernardus Ma-*  
*ria de Rubeis Monumentorum Ecclesiæ Aquile-*  
*jenfis Cap. XXXII. Num. 2. At quod*  
*pace tantorum virorum dictum sit, palam*  
*est eos mala interpunctione deceptos, sen-*  
*suum verborum Joannis Diaconi minime as-*  
*sequutos fuisse. Non enim ait Joannes a*  
*Gregorio Calchedonensem Synodum vene-*  
*rari compulso, atque a Schismate ad uni-*  
*tatem Ecclesiæ revocatos fuisse Episcopos*  
*sub libello confessos, ex quibus verbis nul-*  
*lus pæne eruitur sensus: sed eosdem sub*  
*libello confessos Calchedonensem Synodum*  
*venerari, hoc est emissa Professione, in qua*  
*Synodum illam se venerari confitebantur,*  
*nulla interim V. Synodi (ne scilicet pax*  
*turbaretur, ut ex ipsius S. Gregorii Epist.*  
*XXXIX. Lib. IV. liquet) mentione inje-*  
*cta, a Schismate, Gregorio compellente,*  
*ad unitatem S. Ecclesiæ revocatos fuisse.*

XX. Sed ut ad *Paullum Diaconum* re-  
 vertamur, dici vix potest, quot, quantos-  
 que viros celeberrimi illius Scriptoris au-  
 ctoritas in errorem adduxerit, qui rem  
 minime perpendentes, pro ut illam ab eo  
 acceperant, fideliter retulerunt. Eundem  
 errorem errarunt *Historiæ Miscellæ* scri-  
 ptor,

ptor, Auctor *Chronici Patriarcharum Aquilejensium*, quod post Cl. Muratorium publici juris fecit laudatus *Bernardus de Rubéis* in *Appendice ad Monumenta Ecclesiæ Aquilejensis*; *Joannes Diaconus Veronensis* XIV. Sæculi Scriptor in *Historiis Imperialibus* pag. 160. col. 4. quod opus nondum typis editum Veronæ in Maffejana Bibliotheca asservatur; *Bartholomæus Tridentinus*, *Petrus Calo* in *Vita Ingenuini*, quam ex *Bartholomæo* sumit; *Petrus de Natalibus*, *Marcus Antonius Sabellicus*, *Leander Albertus*, *Philippus Ferrarius*, & quod magis mireris, *Carolus Sigonius*, inter principes XVI. Sæculi litteratos viros merito connumerandus; immo recte monet laudatus *Norisius*, ex eo *Pauli Diaconi* lapsu sinistram illam de Manichæa Eliæ & Severi hæresi opinionem effluxisse, quæ tot deinde illustribus scriptoribus fucum fecit. Idem sentiendum non modo de *Andrea Danduli*, sed de innumerorum propemodum auctorum alucinationibus, quas hic recensere nimis longum foret. Illud nunc monuisse sufficiat, Patres in Synodo Mantuana, cujus superius mentio facta est, congregatos, ad eundem scopulum allisisse, veramque Schismatis Aquilejensis historiam prorsus ignorasse; in qua quidem Synodo præter *Æmiliæ*, *Liguriæ*, & *Veneticiæ*

netiæ Episcopos admodum XX. interfuerunt: *Vir venerabilis O Sanctissimus Benedictus Episcopus, O Leo reverendissimus Diaconus Bibliothecarius; Legati videlicet Sanctæ Romanæ Ecclesiæ, habentes locum Beatissimi Papæ Eugenii; Sychardus Palatinus Presbyter, O vir spectabilis Theoto, a præfatis Augustis directi; Petronas quoque Ravennatis reverendissimus Archiepiscopus, atque Angelpertus Sanctissimus Mediolanensis Archiepiscopus.*

Porro si *Paullus Diaconus* vir sua ætate nemini secundus, propter scientiam litterarum (ut *Sigebertus Gemblacensis* Cap. LXXX. *De Scriptoribus Ecclesiasticis* testis est) a *Carolo Magno Imperatore* adscitus, & quod caput est, ipsius Ecclesiæ *Aquilejensis* Diaconus: si *Landulphus Sagax*, seu quicumque alius est *Historiæ Miscellæ* auctor: si *Andreas Dandulus* Venetorum Historiographus præclarissimus, immo Venetæ Historiæ pater: si *Bartholomæus Tridentinus*, quem tu *Patriæ nostræ decus* appellas: si innumeri illo etiam celebriores ac nobiliores docti viri, qui Ecclesiæ res persequuti sunt; si denique tot non modo sanctitate, verum etiam doctrina conspicui Præsules, præcipue *Rampertus Brixienis* Episcopus scriptis editis clarus, in eundem, in quem *Paullus Diaconus* impegit erro-

errorem, una omnes incidere, ut tanquam Catholicæ veritatis propugnatores suspicerent, laudarentque Schismaticos Aquilejæ Episcopos, quorum inter primos Ingenuinus noster fuit; cui mirum videri debeat, unam Brixinensem Ecclesiam eodem errore involutam fuisse, atque adeo hunc suum Præsulem ab omnibus venerationi habitum, religiose coluisse? Mihi certe mirandum potius videretur, si communi mediæ ævi errori & ipsa libentissime non subscripsisset. Ex hoc igitur fonte tum excellentem de Ingenuini Sanctitate opinionem, tum cultum ipsi a Brixinensibus jamdiu præstitum, originem traxisse suspicari par est, quæ omnia *Martyrologii Romani* reformatoribus occasionem deinde præbuerunt Sanctis illum adnumerandi.

XXI. Id ut magis magisque firmetur fiatque evidentius, quibus tabulis Ingenuinus in *Romanum Martyrologium* sub *Genuini* nomine tandem illatus sit, nunc breviter exploremus. *Aliqui codices* (verba sunt Cardinalis *Baronii* in suis ad id *Adnotationibus* Nonis Februarii) *pro Genuino legunt Ingenuinum, cujus meminit Paullus Diaconus de Gestis Langobardorum Lib. III. Cap. XII. Scripsit ejus vitam Bartholomæus Tridentinus. De Genuino & Albino simul Petrus in Catalogo Lib. III. Cap. LXXXV.*  
Fuit



*Fuit prior Episcopus Sabionensis, qui quum temporibus Langobardorum in exsilium pulsus esset, ibi mortuus est; corpus autem ejus Brixinonem translatum esse, associatumque S. Albino Episcopo Brixionensi, idem Auctor testatur.*

Ex his liquido constat, *Bartholomæum Tridentinum*, & *Petrum de Natalibus* sanctitatis Ingenuini testes esse antiquiores; *Martyrologium* enim *S. Hieronymo* tributum, quod omnium vetustissimum judicatur; *Beda*, *Florus*, *Rabanus*, *Ado*, *Usuardus*, *Notkerus*, aliique Martyrologi de illius sanctimonia nullam nobis fidem faciunt. *Bartholomæi* lucubrationem *Baronium* minime legisse videtur, eamque dumtaxat ex fide *Petri de Natalibus* laudasse, qui *Petrus* suam *De S. Ingenuino Episcopo* narrationem his verbis claudit: *Hæc Frater Bartholomæus*; quare eam, ut in rebus ignotis fere sit, non ipse tantum *Anna-lij Ecclesiasticorum* conditor, sed alii quoque pluri fortasse fecerunt, quam ratio ipsa postulat. Præstat igitur hic fontem propius inspicere, quidve de iisdem Sanctis *Bartholomæus* memoriæ prodiderit, ante omnia in medium afferre, quum præcipue non adeo proluxa narratio sit, ut tædium parere alicui possit. Ita igitur ille *De SS. Ingenuino, & Albino* ad fidem Codicis

dicis. Bibliothecæ Barberinæ Num. 2061.  
in 4 & ex quo ipse hæc propria manu  
ante aliquot annos Romæ transcripsi: *In-*  
*genuinus, quem S. Paullinus in Gestis Lom-*  
*bardorum, quæ scripsit, clarissimum asse-*  
*rit, Episcopus Sabionensis fuit. Hunc S. Cas-*  
*fianus præcefferat, qui Imolæ immolatus,*  
*martyrium complevit. Sabiona vero fuit*  
*olim Episcopalis civitas, & Aquilejensi Me-*  
*tropoli subjecta: nunc autem sedes translata*  
*est Brixinam, & subest Salisburgensi. Hu-*  
*jus Inguenuini temporibus Lombardi Italiam*  
*occupaverant, & duodecimus eorum Rex Au-*  
*thari regnabat. Severus Eliæ in Patriarchatu*  
*Aquilejensi successerat, quem Smaragdus Pa-*  
*tricius coegit cum quibusdam aliis communi-*  
*care Joanni hæretico Episcopo Ravennati,*  
*qui Romanam Ecclesiam contemnebat. Sed*  
*S. Inguenuinus cum Beatis Episcopis Agnello*  
*Tridentino, Petro Altino, Juniore Vero-*  
*nensi, Hosentio Vicentino, Rustico Tarvisi-*  
*no, Fontejo Feltrino, Agnello de Achilo,*  
*Laurentio Belunensi, Maxentio Julienti, A-*  
*driano Polensi, huic schismati non consense-*  
*runt. His diebus Franci multa castra Tri-*  
*dentinorum fide data everterunt, & castren-*  
*ses abduxerunt. Ferrugo vero fuit castrum*  
*forte, ubi sexcenti viri confugerant, pro qui-*  
*bus Episcopi dicti, Inguenuinus Sabionensis,*  
*& Agnellus Tridentinus intercesserunt oppres-*  
*sos.*

*fos. Postmodum S. Ingenuinus in pace quie-  
vit, cui S. Constantius successit. Post multos  
annos Brixiam (lege Brixinam) transfertur,  
& S. Albuinus, ejusdem Ecclesiæ Episcopus  
miraculis clarus Non. Feb. die qua migrave-  
rat, ei associatur.*

Jam ex hac narratione palam fit, quid-  
quid de Ingenuino *Bartholomæus* noster tra-  
dit, id ex Langobardorum Historiographo  
haustum esse, atque adeo rem totam ad  
*Pauli Diaconi* lacunas recidere. In eo fal-  
litur, quod a *Diacono* Ingenuinum *Clarif-  
simum* vocari ait, mendoso enim Codice  
deceptus Lib. III. Cap. XXVII. *De Gestis  
Langobardorum* legisse videtur: *Petrus de  
Altino, clarissimus Ingenuinus de Sabione  
&c.* Sed eo loco nomen Episcopi propri-  
um, male apponi ut epithetum, aut Pe-  
tro Altinati, ut plures editiones habent,  
aut Ingenuino, ut aliqui Codices præfe-  
runt, legendum autem esse: *Petrus de Al-  
bino, Clarissimus de Concordia, Ingenuinus  
de Sabione &c.* jam pridem a doctis viris  
adnotatum fuit. Hinc licet intelligere, cur  
*Joannes Diaconus Veronensis* in opere pro-  
xime laudato *Viri Clarissimi* titulo Inge-  
nuinum & ipse exornet, Auctor autem  
*Chronici Patriarcharum Aquilejensium* ve-  
ro nomine rejecto, eundem *Clarissimum  
de Sabione* vocet.

*Petrus de Natalibus*, qui *Bartholomæum* transcribit, nihil novi affert, nisi quod ait *Ingenuinum secundum Episcopum Sabionensem fuisse, ut scribit Paullus in Gestis Langobardorum*; quod splendidum mendacium est, id enim non a *Paullo Diacono*, sed a *Bartholomæo Tridentino* traditum, cujus verba cum *Paulli* verbis perperam confudit *Petrus de Natalibus*: deinde *Episcopos*, quos *Bartholomæus* Schismati non consensisse asserit, & *Beatos* appellat, ipse *Sanctos* vocat, & multas injurias perpeffos fuisse addit, *Ingenuinum* vero exsilio insuper multatum. Propter quod omnes præ-nominati *Sancti* multas injurias perpeffi sunt. *Sanctus* vero *Ingenuinus* actus in exsilium, in pace quievit. Verumenimvero quum perspicue non indicet num ab *Authari*, an a *Smaragdo* in exsilium missus sit, occasionem aliis dedit id clarius explicandi. Igitur in *Officiis Propriis Sanctorum Ecclesiæ Brixinensis* scriptum legitur, sub *Authari Flavio Langobardorum Rege Italiam devastante* id contigisse, quod confirmat *Matthæus Raderus Bavariciæ Sanctæ* Vol. III. in *Vita Ingenuini*.

*Baronius* qui Schismatis *Aquilejensis* historiam rectius tenebat, probeque noverat *Autharim* anno DXC. die V. mensis Septembris extinctum fuisse, atque adeo In-

genuinum (qui, ut sæpius dictum, anno DXCI. supplici ad Mauritium Libello sub-  
scripsit) in exsilium ab eodem missum me-  
rito dici non posse; tum causam exsilii,  
tum auctorem illius amovit, & in alia  
omnia, licet sine teste, abiit, ad annum  
enim DCXXXVIII. Num. XII. ita scribit:  
*Hoc eodem anno Ariovaldus Rex Langobar-  
dorum, idemque Arianus (de quo plura  
superius) ubi regnasset annos duodecim, mo-  
ritur; inque locum ejus subrogatus est Ro-  
tharis iidem Arianus..... Porro, etsi sub  
Ariano Rege non reperitur indicta in Ca-  
tholicos persecutio: accidebat tamen inter-  
dum, ut si qui Episcopi æstuentes zelo Ca-  
tholicæ fidei urgerent Arianos, iidem ab  
eodem Rege exsilio multarentur, ut conti-  
git S. Genuino sive Ingenuino Episcopo Sa-  
bionensi, qui a Rege Langobardorum in exsi-  
lium pulsus apud Brixinonem in Germaniam,  
ibidem diem obiit, junctusque sepultura est  
S. Albino ejusdem civitatis Episcopo æque  
Sancto, factumque est, ut amborum una  
eademque dies natalis in Ecclesia celebretur  
Nonis Februarii. Jam exsilii Ingenuini caus-  
sa non est, quod Schismati consentire no-  
luerit, ut Petrus de Natalibus attestatus  
fuerat, sed Ariana Langobardorum Regum  
hæresis: nec ejusdem exsilii fulminator est  
Autharis, sed Rotharis, qui apud Brixino-*  
no-

nonem eum misit. At qua ratione in exilium eo mitti potuit Ingenuinus, si Brixina ea ætate nondum condita erat? Quod si per *Brixinonem* Sabionam intellexit *Baronius*, quis unquam audivit Episcopum quempiam in exilium mitti quum ad Ecclesiam suam destinatur?

Sed Annalium Ecclesiasticorum Cenfori *Antonio Pagio* neque Autharis, neque Rotharis placuit; quare Arioaldum Rotharis decessorem exilii illius auctorem fecit. Quum enim Acta Concilii Gradenfis, quod anno DLXXIX. celebratum dicitur, & cui Ingenuinus subscripsit, admitteret *Pagius*, Rotharis autem juxta ejusdem calculos anno demum DCXXX. Langobardorum regnum suscepit, minus verosimile ei visum fuit, Ingenuinum unum supra quinquaginta ut minimum annos in Episcopatu transegisse. Scilicet in re obscura, & nullo certo documento, nullo probato auctore roborata, dum unusquisque conjecturis suis indulget, unus unam, alius aliam facti speciem nobis præbet. Addiderim ego, neque Autharim, neque Rotharim, neque demum Arioaldum exilii illius auctorem esse potuisse, quum Langobardorum imperium Sabionam usque minime funderetur; proindeque factum illud tanquam commentitium & pro scripto-

rum arbitrio confictum, explodendum omnino esse.

Porro Ingenuinus jam Sanctus effectus, miraculis carere non debuit, quorum tamen veterum scriptorum nullus, quod quidem sciam, meminit; *Bartholomæus* enim, & *Petrus de Natalibus* Albuinum quidem miraculis clarum vocant, sed de Ingenuino prorsus silent. At ecce præsto adest *Hundius*, qui in *Metropoli Salisburgenfi* miracula etiam illius commemorat, ait enim Episcopatu Sabionenfi Brixinam translato, una & ossa ejus translata fuisse, *ubi in hodiernum diem miraculis clarus quiescit*. Quod tamen ab antiquiore quopiam scriptore sumtum fuisse infitiri nolim, quum illud idem legere sit in Martyrologio, quod *secundum morem Romanae Curiae* emendavit *Bellinus* Patavinus, ediditque Venetiis anno MCDXCVIII.

Nunc eos qui sapiunt, quique veritatem unice diligunt appello, rogoque ut attento animo secum ipsi reputent, quam exigua, quam simplicia, quam uniformia sint, quæ de Ingenuino antiquitas protulit: contra vero quam multa, quam varia, quam inter se pugnantia, quæ a recentioribus allata sunt, ut quanto propius ad Ingenuini ipsius ætatem accedimus, tanto pauciora de illo nobis innotescant: quan-

quanto vero longius ab ea recedimus, tanto plura & majora in vulgus spargantur; ut tandem tuto decerni possit ex quo fonte promanarint, atque adeo pateat quam vere a Poëtarum Latinorum principe scriptum sit:

*Fama, malum quo non aliud velocius  
ullum:*

*Mobilitate viget, viresque acquirit cundo.*

XXII. Illud idem animadvertere licet, si ab externis documentis ad domestica nos conferamus. *Anonymus* Mabillonianus *Paullo Diacono* proximior, ejusdem tenebris non omnino quidem obscuratus, sed tamen aliquantulum obfuscatus fuisse videtur, *Ingenuinum* enim *almum* dumtaxat appellat.

*Ingenuinus habens primo quam rexerat  
almus.*

In antiquioribus Diplomatis, quorum unum a *Gerwoldo* in *Additionibus* ad *Hundii Metropolim Salisburgensem* (pag. 315.) plura vero a te (p. 24.) afferuntur, quæ ad annos DCCCXIV. CMI. CMIX. CMXVI. pertinent, nulla prorsus *Ingenuini* commemoratio fit, sed *S. Cassianus Martyr* in iis tantum celebratur. Prima *Ingenuini* mentio fit in *Diplomate Henrici II. Imperatoris*.



peratoris *Heriberto Brixinensi Episcopo* anno MXX. dato, in quo *Ingenuinus Sanctis* adscribitur; in eo enim memoratur *Ecclesia in honorem SS. Martyris Cassiani, & Ingenuini dedicata*. Id tua fide assero, neque enim Diploma ad manus est, quo de ejus sinceritate judicare possim. Sane in Ecclesiæ Brixinensis Catalogis nullus *Heribertus* cernitur, nisi eum *Herbardus* appellatur. *Wolfgangus Lazius* in *Chorographia Austriae* Lib. VIII. pag. 57. ait eodem anno MXX. Zachariam Episcopum Brixinensem una cum quibusdam aliis Bavariae Episcopis ad Joannem IX. Romanum Pontificem litteras dedisse de restituenda Laureacenſi Metropolitæ jurisdictione, & Moraviae Episcopis constituendis. Verum mendosam esse apud *Lazium* Aetæ Vulgaris notam, non modo ex hoc Diplomate, in quo eo anno non Zachariam, sed *Heribertum* Episcopum Brixinæ sedisse legitur, sed etiam ex eo liquet, quod *Joannes IX.* ad Summum Pontificatum evectus est anno DCCCXCVIII. obiit autem anno CM. Eodem anno CM. datam esse epistolam illam probat *Marcus Hansizius Germaniae Sacrae* Tom. I. pag. 175. qui integram affert.

Aliud Diploma *Conradi II. Imperatoris*  
ad

ad annum MXXVII. pertinens, quod *Ge-woldus* (pag. 316.) recitat, Ingenuinum *Confessorem* vocat, idemque, *Bollando* teste, legebatur olim in Martyrologio Romano a *Bellino* edito, licet in hodierno non appareat. Præterea *Matthæus Raderus* Vol. II. *Bavariæ Sanctæ* in Vita B. Hartmanni Brixinensis Episcopi auctor est, aservari in Pollingano Cœnobio non procul Weilhaimio documentum membraneum, in quo legitur, dictum Hartmannum anno MCLX. Aras duas Pollingani templi inunxisse, in quarum altera, præter alias reliquias, continentur *Reliquiæ SS. Confessorum Ingenuini, Albuini, & Gisilarii*; cujus quidem tituli aliqua ex *Petro de Natalibus* afferri ratio potest, qui tradit Ingenuinum quod Schismati non consenserit, multas injurias perpeffum, immo in exilium tandem pulsum fuisse.

Sed cur antiquos hæc egregia Ingenuini facinora prorsus latuere, cur nullum illorum vestigium in vetustioribus Diplomatis cernere est? Tam sero igitur etiam suis innotuit ejusdem sanctitas, ut post X. demum Sæculum Patronus eligeretur, ac templa eidem excitarentur? Si Ingenuinus merito Sanctis accensetur, religionis, probitatis, integritatisque suæ famam statim ab ejus obitu percrebuisse procul dubio

fatendum est, publica scilicet atque universali populi acclamatione. At si ita sit, cur tamdiu neglectus jacuit, ut non uno atque altero post ejus mortem anno, sed quatuor demum transactis sæculis, publicus ei honor delatus sit? Ejus sane rei non alia causa esse potest, nisi quod sub VI. Ecclesiæ Sæculi finem, aut VII. initium, quum *Paullus Diaconus* adhuc in vivis non ageret, Schismatis vero Aquilejensis sicuti memoria recentior, ita certior puriorque esset narratio; Ingenuinus etiam a suis eo loco habebatur, qui veris, & certis ejusdem Actis penitus respondebat; quæ quidem Acta late postea pervagato palmari *Paulli* errore, & hariolantium scriptorum conjecturis paullatim aucta, & immutata, eo tandem devenere, ut Schismaticum hominem nobis tanquam *Sanctum*, immo etiam *Confessorem* exhiberent.

Id luce meridiana clarius fit sola Brinxinensis *Officii* recitatione, cujus propterea *Lectiōem* V. pæne integram huc asferre operæ pretium duco, quæ sic habet: *Grassabatur autem adhuc infelix illud contra Quintam Synodum Constantinopolitanam Tria Justiniani Imperatoris Capitula damnantem schisma. Quod quum universam prope Catholicam Ecclesiam pluribus annis misere dilacerasset, ipsumque etiam*  
Seve-

*Severum, Eliæ Aquilejensis Patriarchæ successorem, ac plures Episcopos infecisset; Ingenuinus tamen una cum paucis quibusdam orthodoxis, non modo adduci non potuit, ut consentiret, verum etiam Marianam Synodum præsentia & auctoritate sua laudabiliter condecoravit; in qua dictus Severus Patriarcha revocato errore, receptus fuit in gremium Catholicæ Ecclesiæ.*

Jam verbis opus non est, ut quisque intelligat ex quo fonte hæc hausta fuerint. Prodit sese tandem veritas ipsa per se larva omni detracta. Jam Brixinenses ipsi fatentur, *Paullum Diaconum* sanctitatis Ingenuini sui unicum testem esse, quo auctore quantum illis gloriari liceat ex superius dictis satis superque constat. Ergo is *Marianam Synodum præsentia & auctoritate sua laudabiliter condecoraverit*, qui eam una cum reliquis schismaticis coëgerat, ut Severum, qui Ravennæ ad Romanam accesserat Ecclesiam, ad schisma de novo revocaret? Qui alii etiam Pseudosynodo interfuit, in qua statutum, ne quis Romam proficisceretur ad Synodum, quam S. Gregorius Papa pacis & concordie statuendæ gratia indixerat? Qui denique Apostolicæ Sedis judicium declinans, & a Pontifice ad Cæsarem provocans, hæc Mauritio Imperatori una cum refractariis collegis

gis scribere non est veritus: *Contriti, atque luctu gravissimo sauciati, ad ultimam desperationem pervenimus, ut ad illius (S. Gregorii Papæ) iudicium Metropolita noster cogeretur occurrere, cum quo causa ipsa esse dinoscitur, & cujus communionem ab initio motionis causæ hujus usque nunc decessores nostri, & nos cum omni populo evitamus? Ergo Severus receptus fuit in gremium Catholicæ Ecclesiæ, quum Catholica Ecclesia relicta, ad Schisma rediit? I tu nunc, Roschmanne, & te jacta Brixinensium documenta quamquam recentiora, sincera tamen esse, & antiquitati perfecte consona, atque adeo remerarium, & emotæ mentis voca eum, qui illis aquiescere nolit. Tolerabile certe ac venia dignum videri potuit, ex eo *Pauli* testimonio quamquam fallaci, Brixinensis Ecclesiæ historiam luculentiorē ornatiorēque reddere. Forojulienfes Historiographi, ut sæpe laudato *Norisso* adnotatum, tradunt Schismaticos Episcopos omnes pie in Domino obdormuisse. De Severo Schismaticorum pessimo *Palladius* Par. I. Lib. I. ad annum DCV. auctor est, morti proximum errorem esse averfatum. *Joannes Candidus* Lib. III. *Antiquit. Aquilejens.* ait recta per annos XV. Ecclesia, sanctissime obuisse. De Elia ad annum DLXXXVI. scribit idem  
Pal.*

*Palladius*, approbasse in synodo Constanti-  
nopolitanum Concilium, & diem in Do-  
mino obiisse. Paullinum quoque Apostoli-  
cæ Sedi conciliatum ajunt, & *Beati* titu-  
lo, *Paullo Diacono* præeunte, insigniunt,  
qui inter Schismaticos pervicacissimus fuit,  
& a Pelagio Summo Pontifice execratus,  
Ita receptus fere recentiorum Historiogra-  
phorum mos est, ut minus decora aut in-  
vertere, aut silentio præterire (quasi pessi-  
morum facinorum non scriptores dumtaxat,  
sed auctores haberi a suis lectoribus  
debeant) ita splendida & gloriosa unde-  
cumque corradere, quo patriæ res amplio-  
res illustrioresque fiant. Quare si vulgari  
consuetudini, licet improbandæ, aliquid  
etiam a Brixinensibus datum fuisset, erran-  
tium multitudo aliquod forte errori patro-  
cinium parere potuisset. Nunc quum adeo  
falsa, adeo absurda, & quæ merito piorum  
aures offendant, inter sacra precum officia  
Deo etiam offerre voluerint, mirum id  
certe videatur cordatis omnibus: num ve-  
ro insuper diutius tolerandum, Ecclesiasti-  
cæ disciplinæ Magistri, ac Summi rei  
Christianæ moderatores profecto viderint;  
mihi enim privato homini quicquam defi-  
nire neutiquam licet. Sane veterum male  
actorum commemoratio ad justissimi Nu-  
minis iram potius (nisi ignoratio interce-  
dat)

dat) quam ad misericordiam provocandam, longe aptior esse videtur. *Gelasius I.* Summus Pontifex in Concilio LXX. Episcoporum Romæ habito, hæc ait apud *Gratianum* Dist. XV. Can. III. *Gesta Sanctorum Martyrum, qui multiplicibus tormentorum cruciatibus, & mirabilibus confessionum triumphis irradiant, ideo secundum antiquam consuetudinem singulari cautela in Sancta Romana Ecclesia non leguntur, quia & eorum, qui conscripsere, nomina penitus ignorantur, & ab infidelibus, aut idiotis superflua, aut minus apta, quam rei ordo fuerit, scripta esse putantur. Propter quod, ut dictum est, ne vel levis subsannandi oriretur occasio, in Sancta Romana Ecclesia non leguntur.* Si tam caute, ac sollicitè se gessit Romana Ecclesia ne Sanctorum Acta anonyma, & interpolata, palam in sacris Christianorum conventibus recitarentur, quippe quæ aut nullius, aut dubiæ essent fidei; quid, quæso, egisset circa Acta non tantum supposititia, & imperite scripta, sed absona, turpia, & quæ omnem hæreticis subsannandi occasionem nedum non tollant, verum etiam certissime præbeant?

XXIII. Sed pergit *Bollandus* Ingenuini causam omni conatu propugnare, aitque in *Officio Brixinensi* scriptum esse, Episcopum

pum illum, Urbem & Ecclesiam Sabionen-  
jem, Theodonis III. Bavariæ Ducis benefi-  
centia restaurasse; quibus verbis ita ipse  
subdit: Si tamen Theodo III. sumtum ad  
illius Ecclesiæ restorationem contulit, In-  
genuinum oportet jam ante ab schismate  
resiliisse. Neque enim Ecclesiæ hostem Theo-  
do, qui recens Christo adjunctus ab S. Ru-  
perti consiliis totus pendeat, eo esset favo-  
re ac munificentia dignatus; sed illud huic  
succurrisset, quod ad Joannem Ravennatem  
scripsit S. Gregorius Lib. II. Epist. XXXII.  
Misericordia prius fidelibus, ac postea Ec-  
clesiæ hostibus est facienda.

Respondeo primo, negare alios Sabio-  
nam, postquam ab Hunnis & Attila ever-  
sa est, unquam instauratam fuisse, verum  
ei Clusum oppidum ad pedem montis Sa-  
bionæ affixum, successisse, quæ Christophori  
Gerwoldi sententia est in Additionibus ad  
Hundii Metropolim Salisburgensem. Sane  
Joannes Aventinus, Marcus Velserus, An-  
dreas Brunnerus, Joannes Adlzreitterus,  
Matthæus Raderus, Marcus Hansizius, alii-  
que rerum Boicarum scriptores, nullam  
facti hujus mentionem faciunt. Juvaviam  
quidem; hoc est Salisburgum, summa li-  
beralitate S. Ruperto donasse Theodonem,  
urbisque illius Pontificatum pluribus redi-  
tibus locupletasse, tradunt universi: de Sa-  
bio-



bionensis vero Civitatis, & Ecclesiæ re-  
 stauracione omnes silent.

Sed demus *Bollando*, ea omnia certissi-  
 ma esse; quid mirum Theodonem virum  
 Catholicum, & a S. Ruperti consiliis pen-  
 dentem, ære proprio instaurasse tum Ur-  
 bem, tum Ecclesiam Sabionensem, licet  
 ejusdem Episcopus Schismaticus esset? Si  
 Ingenuinus Schismaticus erat, erat tamen  
 Christianus, erat Episcopus, spes etiam  
 fortasse affulgebat eum tandem una cum  
 sociis ad Ecclesiæ unitatem reversurum,  
 cur Theodo si ad Urbem restaurandam sum-  
 tum contulerat, id Ecclesiæ denegasset?  
 Basilica illa Templum Dei erat, etsi ejus  
 Episcopus Templum Diaboli esset; neque  
 enim Sacra Ædes rectoris pravitate infici  
 polluique potest. S. *Gregorii* effatum præ-  
 ter rem adducitur, non enim tradit *Offi-  
 cium* Brixinense Ingenuinum ipsum Theo-  
 donis munificentiam fuisse expertum, sed  
 hunc ad Basilicam Sabionensem instauran-  
 dam æs contulisse, quod profecto non erat  
*Ecclesiæ hostibus misericordiam facere*, sed  
 Dei Templum ad ejus gloriam propriis  
 sumtibus renovare; neque Ingenuinus, qui  
 in captivis redimendis magnam pecuniam  
 irrogaverat, misericordia Theodonis ege-  
 bat.

Hæc reponerem, si facti illius veritas  
 con-

constaret: at ea labante, tota *Bollandi* ratiocinatio in fumum nebulasque resolvitur. Teodo ille Bavarix Dux, qui Secundus, non Tertius fuit, S. Rupertum in Boicam regionem non accersivit ante annum DCXCVI. Anno DCCXVI. idem Sanctus Vir Episcopatum Salisburgensem constituit. Circa annum vero DCCXVIII. Theodo ad Superos evolavit. Hæc quum Ecclesiasticæ Bojorum historiæ studiosis notissima sint, longiorem non desiderant orationem, qua de re consulendus *Marcus Hansizius* Tom. II. *Germaniæ Sacræ* in Vita S. Ruperti Bojorum Apostoli, & in *Adnotationibus* ad eandem. Nisi igitur Ingenuinum Nestorea stirpe progenitum fuisse dicamus, qui ab anno DXC. quo jam inter Episcopos florebat, usque ad annum DCC. & ultra vitam produxerit, Theodonis liberalitatem experiri non potuisse evidentissimum est. En aliud sinceritatis Brixinensium traditionum luculentissimum specimen.

At quando sanctitatis Ingenuini vindices tam anxie demonstrare nituntur, eum a Schismate tandem recessisse, & Catholicæ fidei agnovisse veritatem, age vero id totum, quod numquam tamen probarunt, iis liberaliter concedamus. Quid tum? Sanctus ne ideo dicendus erit? Sed ubi  
egre-

egregia facinora, ubi actiones heroicae, ubi animi virtus, & in his usque ad vitae finem perseverentia, quæ Sanctum fuisse evincant? Neque enim qui Schismaticus non est continuo Sanctus appellari potest, si aliunde factis, certisve monumentis vitae ejusdem sanctitas non demonstratur, quæ facta, & monumenta, quod ad Ingenuinum nostrum attinet, nisi fabellis locus detur, nulla propemodum nobis occurrent.

XXIV. Verum hic instat *Matthæus Raderus*, & sanctitatis insuper Ingenuini non levia indicia nobis ostendere conatur *Bavarica Sanctæ* Vol. III. in ejusdem Vita, in qua ait: *Ingenuinum virum ex eo quoque Sanctum videri potuisse, quod ipse ultima passus, tamen in captivorum lytrum magnam vim pecuniæ Francis expenderit, quum in singula virorum capita sexcentos Solidos adnumerarit, ut Paullus Diaconus Lib. III. Cap. XXXII. docet. Quod repetit Gerwoldus in Additionibus ad Hundium.*

At quum Ingenuinus Sanctus a nobis fuisse negatur, non tamen contendimus eum neque Christianum, neque adeo virum probum fuisse. Facinus a *Paullo Diacono* memoratum eum aliquid boni egisse probat, Sanctum fuisse non probat, præfer-

ferim si a Romanæ Ecclesiæ communione separatus Schismati usque ad mortem constanter adhæserit. *Non enim* (verba sunt *BENEDICTI XIV.* Summi Pontificis in *Litteris Apostolicis de nova Martyrologii Romani editione* §. XXVI.) *in una vel altera bonorum Operum specie Sanctitas, de qua hic loquimur sita est; sed virtutibus in gradu heroica assidue exercitis, atque ad obitum usque productis, probatur.* Sane S. Gregorius Magnus, testis omni exceptione major, Lib. VII. Epist. LXVII. de Schismaticis Aquilejæ Episcopis ita scribit: *Et dum neque in fide recti sunt, neque in bonis operibus intenti, student ut certare pro fide videantur; sicque fit, ut quotidie deteriores fiant, dum in eis culpa grossescit, quæ quasi de zelo fervoris videri etiam laudabilis appetit.* Idem S. Pontifex Epist. LXVI. Lib. VII. Anatolio Diacono, qui Constantinopoli versabatur, commendat nonnullos, qui ab Schismate recesserant, & *multa de pravitate Episcoporum qui in illis partibus sunt, conquerebantur.* Hæc tamen minime urgeo; generatim enim dicta sunt, nec forte ad Ingenuinum spectabant: illud urgeo, uno atque altero Ingenuini recte facto admissio, sanctitatem ejusdem perperam inde inferri; si enim illa argumentandi ratione quicquam

G                      confi.

conficeretur, etiam Agnellus Tridentinus Episcopus *Sanctus* dici deberet, quum, ut ex laudato *Paulli Diaconi* loco patet, ejusdem & ipse ac Ingenuinus facinoris participes fuerit: & tamen Agnellus ut Schismaticus quidem a nobis agnoscitur, ut Sanctus vero non item. *Sanctum* tu quidem auctoritate tua satis liberaliter pronuntias (pag. 64. 65. 113.) At obstat Tridentina Ecclesia, a qua nullo unquam cultu veneratus fuit: obstant Martyrologi omnes, quorum nullus eum Sanctorum albo adscripsit; quare ne expectes, quæso, ut pro tua hac in nos liberalitate a nobis, qui commentitiis falsisque honoribus non delectamur, grates tibi reddantur. Potius disce vel tuo exemplo quam facile fit Sanctorum Catalogum perperam augere.

Ceterum & *Radero*, & *Bollando*, & aliis quoque doctis viris venia utique danda est, quod conjecturis hujuscemodi quamquam infirmioribus, aliquantulum indulserint. Quum enim cultum Ingenuino a Brixinensibus exhibitum firmissimo fundamento innixum esse existimarent, neque tamen quodnam illud esset, detegere potuissent, ad eas hariolationes delapsi sunt, ut aliquam saltem veteris erga illum Episcopum a suis habitæ venerationis rationem redderent.

rent. Quod si eam, quæ a me nuper allata est, ipsis detegere licuisset, substitissent fortasse, sibiue temperassent, quo minus ingenio indulgerent suo, utpote quæ non divinationibus, fictisque Actis, aut nullius roboris argumentis, sed certo & exploratissimo facto nitatur. Sexcentæ hujusmodi etiam verosimiles rationes & conjecturæ comminisci nullo negotio possent. Eæ omnes, iterum dico, laudandæ & amplectendæ forent, si nulla alia firmior extaret: at ratione in medium producta, quæ non modo æque verosimilis est, sed certo etiam atque indubio facto comprobatur, eæ omnes recedant oportet, quæ utut verosimiles, tamen factis vel repugnantibus, vel ex ingenio confictis sustentur; conjecturas enim ex conjecturis ortas, iis locum cedere conjecturis, quæ a certa quapiam veritate profluunt, nemo non æquissimum judicabit.

Neque vero in Ingenuini tui sanctitate vindicanda magnum quid præstares, Roschmanne, si ad antiqua Brixinensis Ecclesiæ Breviaria, Calendaria, Lectiones, Orationes, & id genus alia sedulo excutienda te conferres. Improbo huic labori omnino parce. Si ante *Pauli Diaconi* ætatem publicum Ingenuino a Brixinensibus cultum statutum ostendere potes, ipse quoque vo-

lens, lubensque manus dederim: at si id non potes, conde quæso tua Calendaria; neque enim negamus sequiori ævo eum illi honorem jam a pluribus sæculis tributum fuisse.

XXV. Sed quid dicendum de miraculis, quæ *Hundio* auctore ad Ingenuini tumultum perpetrata sunt, quibus *in hodiernum diem* eundem clarescere attestatur? Nonne ea satis superque probant mirificam illius Episcopi vitæ sanctitatem?

Ego vero, Roschmanne, qui probe noverim, quam facile ex vulgi rumoribus miracula confingantur, aut pro miraculis venditentur quæ naturæ vires nequaquam superant, testem mihi afferri vellem non vagum illum, & auritum, sed certum, gravem, & doctum, qui præsens ea propriis oculis hauserit, excusserit, perpenderit.

Verum fac miracula ab *Hundio* commemorata verissima & testatissima sint, quum eorum tum in *Romano Martyrologio*, tum in *Proprio Brixinensi*, *Matthæo Radero*, aliisque disertissima occurat mentio; nulla tamen inde sanctitatis Ingenuini educi potest conjectatio, nullum argumentum inferri. *Neque enim* (verbis utor V. Cl. *Joannis Mabilonii* in *Epist. De cultu Sanctorum ignotorum* §. XVIII.) *sola miracula etiam vera,*

*vera, sufficiunt ad probandam alicujus sanctitatem, nisi aliunde sanctitas comperta sit, aut ex insigni vitæ integritate, aut ex certo & approbato martyrio. Fieri enim possunt vera miracula ad falsas reliquias, ob fidem ac pietatem eorum, qui eas veras esse credant.*

Quod ad Ecclesiæ Brixinensis gloriam amplificandam non parum valet (id enim minime nunc a me silentio prætereundum fuit, ne indecora tantum persequi videar) unum illud est, scilicet conjici aliqua ratione posse, eam sin minus Ingenuino vivente a Schismate depurgatam fuisse, saltem proxime ab ejus obitu id accidisse, quod certe pro maximo illius ornamento reputandum, quum multæ ejusdem Provinciæ Ecclesiæ, præcipue vero ipsa Aquilejensis Metropolis, adeo multos post annos ea labe fuerint infectæ. Sane S. *Gregorius Magnus* Lib. VII. Epist. XCIV. (nunc Lib. V. Epist. XLVII.) Mastalonem laudat, eique gratias agit, quod in Schismaticis Aquilejæ ad Romanam Ecclesiam revocandis strenuam operam navasset. Porro Ingenuino in Episcopatu Sabionenfi Mastulonem successisse *Anonymus* Mabillonianus testis est.

*Mastulo secundus, seditque regendo Cathedralam,*



licet in vulgaribus elenchis decimus quintus, aut decimus sextus ordine collocetur; qui Mastulo, quod idem ille sit, cujus laudes a S. Gregorio celebrantur, quive postea Episcopus Sabionensis sit effectus, valde mihi verosimile videtur.

XXVI. Verum, ut quæ hætenus fufius disputata sunt, paucis concludam, quum ex Schismatis Aquilejensis historia, prout *Paullus Diaconus* eam refert, pronum factum sit Schismaticos Aquilejæ Episcopos quasi Sanctos, & Confessores amplecti ac venerari, ut *Bartholomæi Tridentini*, *Petri de Natalibus*, aliorumque exemplo comprobatum fuit: quum medio ævo, hoc est ætate densissimis ignorantix tenebris involuta, satis obvia sint exempla Ecclesiarum, quæ, quod attinet ad cultum Sanctorum, a recto Ecclesiasticæ discipline tramite ob Episcoporum oscitantiam ita aberrarunt, ut *Alexander III.* & postea *Innocentius III.* videntes abusus, qui oriebantur circa Sanctorum cultum, prohibuerint, ne deinceps aliquis pro Sancto coli inciperet sine Romani Pontificis approbatione, ut *Robertus Bellarminus* testis est in Lib. I. Cap. VIII. *De Sanctorum Beatificatione*; qui abusus in hac nostrorum temporum luce (nominibus parco, ne ingrata rei memoriam renovare videar) minime desunt: quum Germani, quod

quod ad religionem spectat, simpliciores aliquanto sint, ne quid deterius dicam, quam reliquæ nationes: quum denique Ingenuinus jam inde a IX. Ecclesiæ Sæculo *almus* vocatus fuerit, ab *Anonymo* scilicet Mabilloniano; quid mirum si Brixinensis Ecclesia tum quum in Beatorum numerum relatio privata auctoritate, idest Episcopi una cum populi suæ Diocesis consensu peragebatur, neque Summi Pontificis suffragium accedebat, re minus perpensa, neque ad examen revocata, publicam tandem huic suo Præfuli venerationem cultumque decreverit, altaria excitaverit, templa demum erexerit? Quid mirum si inde factum sit, ut plura veris illius Actis ex ingenio ab aliis addita sint, atque adeo cultus ex falsa *Pauli* narratione ortus, falsas alias fiktasque narrationes produxerit? Quid denique mirum si hæc omnia, præsertim vero perantiquus Ecclesiæ Brixinensis cultus, *Martyrologii Romani* curatoribus fucum fecerunt, adeo ut Ingenuino tandem locus datus sit? Quum enim nulla appareret ratio, nulla suspicio nata esset, cur Brixinensium cultus temere inuestus judicari posset, merito ac jure pro certo atque indubitato sanctitatis signo ille habitus fuit.

Illud idem erga alios quoque ejusdem cœtus Episcopos profecto accidisset, si faci-

## CIV

les adeo cives invenissent, qui aris templisque dicatis, eos venerari, atque in suos Patronos eligere non detrectassent. Sane nullum ego ex illis invenio, cujus memoria adeo illustris ac sancta ad nos usque pervenerit, ut Ingenuini memoria fuit; quod scilicet *Pauli Diaconi* merces etsi longe lateque diffusæ, & quamquam scriptores multos cum sacros, tum profanos sefellerint, adeo tamen fortunatæ non fuerint, ut Episcopos, Civitates, ac Diœceses integras fucato nitore suo decipere valuerint. Emptorem tamen aliquem, qui licet tanti eas non fecerit longe tamen quam par est, æstimarit, apud Forojulientes, & Vicentinos natæ fuisse videntur; nam præter binas Utinensis Aulæ Patriarchalis Inscriptiones superius memoratas, in quibus Severi, & Eliæ Aquilejensium Episcoporum sanctitas celebratur, qui a Romanæ Ecclesiæ communione sejuncti, obfirmato in Schismate animo obierunt; testis est *Bernardus Maria de Rubéis* in *Admonitione* in *Appendicem* ad *Monumenta Aquilejensia* in insigni Ecclesia Collegiata S. Mariæ Civitatis Forijulii Episcoporum Aquilejensium Catalogum asservari, quem *Singulis annis die secunda Februarii in Festo Purificationis Deiparæ, Candelarum distributione completa, ante Missarum solemniam, coram palamque ex Odeo atra*

*ta voce recitat Canonicus Archidiaconus.*  
 Quem morem in Aquilejensi Metropolitana Ecclesia olim viguisse probat, recteque conjicit ex vetusto Diptychorum usu profuxisse. Porro in hoc Catalogo non modo laudati Severus, & Elias, verum etiam reliqui omnes Schismatici Aquilejæ Episcopi ordine recensentur, eodemque, quo illustres revera ac conspicui sanctitate, & doctrina ejusdem Ecclesiæ Præsules afficiuntur honore, omisso interim Candidiano Orthodoxo Patriarcha cum reliquis usque ad Petrum. Quod ad Vicentinos attinet, de Horontio illius urbis Episcopo, & Ingenuini nostri collega, hæc tradit Ugbellus Tom. V. *Italiae Sacrae* in Episcopis Vicentinis: *Horontius anno DXC. apud Paulum Diaconum, & Petrum de Natalibus titulo beatitatis insignitur* (ubinam Diaconus Horontium *Beatum* appellet, mihi incompertum) *tametsi apud Baronium inter Schismaticos Episcopos Severi Patriarchæ Aquilejensis affectas adnumeretur. Ejus memoria habetur Vicentiæ Die V. Junii.* Quibus postremis verbis cultu aliquo a Vicentinis Horontium prosequutum fuisse Ugbellus innuit. Quem cultum, quicumque demum ille fuerit, post *Pauli Diaconi* ætatem invaluisse, ac tum ipsi *Paullo*, tum aliis, qui in eadem hæresi fue-

fuertunt, acceptum referri oportere, tam mihi certum est, quam quod maxime. Quo denique minus mirum sit, Sabionensem Ecclesiam in Langobardorum Historiographi foveam incidisse, quum Vicentina in ipsa Italia constituta, & multo Sabionensi illustrior, vitare illam penitus non potuerit. Ceterum eodem impræsentiarum errore eam teneri nemò sibi persuadeat; nam Vir eruditus Franciscus Fortunatus Vigna, qui in Vicentinorum rebus tum sacris, tum profanis illustrandis versatur, me per litteras monet, ab illa Ecclesia nullum nunc Horontio cultum impendi. Quod quidem recte sapienterque factum; ut enim modo laudatus *Mabillo-*  
*nus* §. XII. ejusdem Epistolæ *De cultu*  
*Sanctorum ignotorum* prudenter præcipit, quod ad hanc rem attinet, *Prima regula*  
*est, ut Sancti nequaquam dubii sint, sed*  
*certi & indubitati, utpote certis & indu-*  
*bitatis recogniti argumentis.* Id enim ad religionis sinceritatem spectat, ut non nisi certa fidelibus sanctioris vitæ exempla proponantur. Si ergo dubium sit (addit §. XXI.) eorum martyrium, vel incerta sanctitas; non colendi sunt, sed ad summum honesto habendi loco. Quam in rem Paragrapho proxime antecedenti factum narrat, quod V. Cl. Danieli Papebrochio contigit,

tigit, plane dignum quod hic referatur: Cum anno MDCLX. (Papebrochii ipsius verba sunt Tom. V. Maii pag. 223.) venissemus Ravennam, & XX. die Novembris ingressi ornatissimum templum novæ Classensis intra urbem Monasterii, adoravissemus sub majori Ara quoddam corpus sacrum, illic depositum & decentissime conditum a quodam Cardinali Legato, admoniti esse Sanctæ Argyridis matronæ, & Martyris Græcæ, cujus ibi festum quotannis ageretur die XXIV. Aprilis; ducti fuimus post Altare, ut spectaremus marmores aut quatuor pedes longum, altum vero unum, quod cum corpore illo pariter allatum fuerat his inscriptum notis:

ΓΑΤΚΙΤΑΘ. Ψ ΓΥΝΑΙΚΙ  
ΑΡΓΥΡΙΔΙ. Ψ ΤΡΟΦΙΜΟ,  
ΑΝΗΡ. Ψ ΕΤ. ΕΣΗ Ψ ΑΣ.

Rogabant adstantes, ut ipsum sibi latine redderemus. Hanc ergo interpretationem eis scriptam reliquimus: Dulcissimæ mulieri Argyridi Trophimus maritus. Annis vixit XXXVI. monuimusque removendum a templo videri saltem lapidem, qui natus esset scandalum parere intelligentibus, & mulieri forsitan ethnicae positus, ac deinde a Christianis fuisset allatus in cryptam, ut alicujus

*Martyris loculo claudendo servires pro latere. Nam illa corda (istic enim; ubi nos litteram V. posuimus, notula quædam erat, aliquam speciem præbens transfixi cordis) si vera sunt corda, solum esse indicia doloris, quem maritus hæuserit ex jactura tam cara conjugis. Quod in aliis pluribus ethnorum epitaphiis videre erat . . . . Cum Ravennati Archiepiscopo innotuisset nostrum de lapide isto judicium, prædictam Congregationem, quæ scilicet super indulgentiis, sacrisque reliquiis Romæ instituta est, consuluit; & responsum accepit, non solum amovendum lapidem, sed ipsum quoque illud corpus, quod Martyris esse nullo jam certa argumento patebat, restituendum Domino Cardinali, qui ipsum donaverat. O dignum certe (continuo subdit Mabillonius) Romana gravitate judicium sacra illius Congregationis! a qua sine dubio eandem omnino sententia in similibus factis speranda est, si de his pariter consulatur.*

XXVII. At quærat hic ex me fortasse quispiam, qua demum tempestate, & quo procurante, tantus Ingenuino honor delatus, ut Romano Martyrologio inscriberetur? Id scire nostra non parum refert, inde enim quantum ei juris ex illa insigni prærogativa accesserit, palam erit.

*Martyrologium illud, quod si prima ejusdem*

dem exordia spectes, initio ferme nascentis Ecclesiæ coalescere cœpit, Martyrologiorum omnium, quotquot deinceps subsequuta sunt, fons & origo merito appellari debet, a quo singula quasi a fonte rivi dimanant. Si quis horum omnium, quæ a nobis sunt recensita Martyrologia (inquit Baronius Cap. IX. Dissert. De Romano Martyrologio, eidem præfixæ) & quæ postea accesserunt, originem petat, & ad suum principium reducere velit, omnia e Romano, velut ex trunco ramos, producta esse cognoscat. Quæ etiamsi (ut de fluminibus accidit, quæ quum e suo fonte modica scaturigine fluant, licet majorum fluminum accessione turgescant, tamen nomen, quod ab eo acceperant, non tantum non amittunt, sed communicant ceteris) sic a suo principio nomen sumerent; prædicta omnia, non Hieronymi, non Bedæ, vel Flori, non Ussuardi, Adonis aliorumve nomine essent inscribenda, sed Romani Martyrologii ab hoc, vel illo aucti, essent potius titulo consignanda.

Firmissimo hoc, & quod jure nemo infitiri possit, fundamento posito, sequitur inde, si quod nomen in nullo ex memoratis posterioribus Martyrologiis recensetur, illud a veteri Romano Martyrologio exulasse, pro certo habendum. Porro notatum



tatum jam superius a nobis fuit in antiquissimo, quod *Hieronymo* tribuitur, *Martyrologio*, nullam Ingenuini nostri mentionem fieri. *Beda*, *Florus*, *Rabanus*, *Ado*, *Ufuardus*, *Notkerus*, ceterique veteres Martyrologiorum scriptores, ad unum omnes æque id illo silent; ex quo tuto inferas licet, non modo *Martyrologia Romano* inscriptum non fuisse Sabionensem hunc Episcopum proxime ab ejus obitus die, sed ne post multa quidem sæcula ac postremis demum temporibus precario quodammodo aliquem in eo locum invenisse. Quæ quidem res quam parum ejus causæ emolumenti afferat, immo quantum officiat; nemo sane non videt. Si enim Ingenuinus VI. Ecclesiæ Sæculo floruit, ut certe floruit, cur in antiquis Sanctorum fastis nomen ejus non cernitur, cur nullus veterum Martyrologorum illius memoriam recolit? Latuit ergo antiquos omnes ejusdem vitæ sanctitatis, & posteriori demum ævo emerfit? At quænam monumenta in apricum protulit senior ætas, quænam acta detecta sunt? Nihil propemodum; sed meræ tenebræ, mera somnia, meræ alucinationes.

Quis igitur nobis illum invexit, & quæ id ratione ductus præstitit? Rationem proxime attigimus, hoc est cultum perantiquum Brixinensis Ecclesiæ, qui pro certo

san-

sanctitatis indicio ( neque enim causa alia  
tum occurreret ) habitus est. A quo vero  
fuerit eo privilegio donatus , si in re ob-  
scura divinare licet, *Bellino* Patavino Ere-  
mitanæ Familæ alumno auctore factum id  
esse arbitramur ; *Bollandus* enim , qui de  
Sanctis omnibus adeo bene meritus est ,  
quive speciatim quidquid ad Ingenuini san-  
ctitatem comprobendam facit, undique col-  
lectis monumentis, indicare non omisit ad  
Diem V. Februarii, nullum antiquius Mar-  
tyrologium in quo Ingenuinus appareat, of-  
fendit eo , quod laudatus *Bellinus* publici  
juris fecit Venetiis anno MCDXCVIII.  
Quod quidem Martyrologium licet *Ussardi*  
*Martyrologium* sit ( quo tum communiter  
utebantur Occidentis Ecclesiæ pæne omnes,  
etiam urbis Romæ, una Vaticana excepta )  
tamen multis a *Bellino* additamentis auctus  
fuit, ut cernere est in accuratissima *Ussar-*  
*diani* Martyrologii editione a *P. Jo. Bapti-*  
*sta Solerio* procurata ; inter quæ additamen-  
ta Ingenuini nomen ponendum est , quod  
in sincero, & expurgato *Ussardi Martyro-*  
*logio* nusquam apparet.

Porro quum Gregorius XIII. Sumus Pon-  
tifex in animum induxisset novam Marty-  
rologii editionem quantum fieri posset ca-  
stigmatam , quæ omnibus Ecclesiis inservi-  
ret, adornare, atque eam curam pluribus  
præ-

præstantissimis in Urbe viris demandasset, inter quos fuisse Robertus Bellarminus, & Cæsar Baronius; ii *Ussardi Martyrologio* usi sunt. In expurgando autem ab erroribus *Ussardi* textu, etsi ad veteres Martyrologos, quos Romani *Martyrologii* rivulos appellavimus, subinde confugerint, laboribus tamen recentiorum proficere non recusarunt, præcipue vero *Bellini*, & *Molani*, quibus in illa editione elaboranda multum detulerunt. En qua ratione Ingenuinus, novem a sua ætate elapsis sæculis, in *Romanum Martyrologium* tandem irrepsit. Quæ quidem res, si penitius introspectiatur, neque nova, neque mira videri profecto possit, nisi ei, qui opere in longo doctissimis etiam viris somnum aliquando obrepere ignoret, idque exemplo haud carere prorsus nesciat. Auxentius, ut id obiter innuam, Mopsuestenæ Ecclesiæ in Cilicia Episcopus, Arianus fuisse videtur, ut a *Fratribus Balleriniis* Lib. III. Cap. IV. Num. II. *Observationum in sacra Norisii Opera* adnotatum, quod etiam in causa fuit cur ejusdem nomen ab illius Ecclesiæ Diptychis exfularet: tamen *Martyrologio Romano* insertum est ad Diem XVIII. Decembris. Illud sane merito ac jure quis miretur, *Baronium* Annalium Ecclesiasticorum parentem, emunctæque naris virum, quum auctorem, qui Ingenpinum Sanctis accen-

accenseat, *Petro de Natalibus* antiquiorem vidisset nullum, cum autem *Paulli Diaconi* errorem sequutum, turpissime alucinatum fuisse constet; nullam tamen hac de re dubitationem ingessisse, atque ad eundem *Petrum* tanquam ad idoneum sanctitatis Ingenuini testem, lectorem suum remisisse, quum præsertim idem *Baronius Paulli Diaconi* sphalma non modo agnoverit ipse, sed aliis etiam indicaverit, ita scribens in *Annalibus Ecclesiasticis* ad annum DLXXXVI. Num. LXXXVII. *Sed hic lector attendat, gravissime in errorem lapsum Paullum Diaconum, aliis errandi occasionem fuisse, dum putavit damnatores Trium Capitulorum eosdem fuisse ab Ecclesiæ communione extorres; ut dum de Johanne Ravennate asserit, eo quod Trium Capitulorum damnator extiterit, a Romanæ Ecclesiæ communione excidisse: adeo ut plane convincatur ipse Paullus de Tribus Capitulis historiam minime affecutus fuisse. In quem errorem lapsos vidimus recentiores Historicos, & quidem disertos viros, Paullum errantem secutos: ex quo factum est, ut in devium, semel immisso pede, iidem implicati teneantur aliis multis erroribus, ut quum dicunt, Joannem Ravennatem Episcopum adversus Romanam Ecclesiam rebellasse, atque Smaragdum Exarchum adversus Catholicos Episcopos concitasse, &*  
*alia*

*alia hujusmodi veritati contraria : nam ita in re tanta a vero exorbitantes , vix credi potest , in quot sint abducti mendacia , nec quidem levis momenti , dum qui fuerunt Catholici , collocant inter schismaticos , schismaticos vero inter Catholicos numerant , & persecutorem vocant Exarchum Smaragdum , qui schismaticos zelo pietatis exagitavit . Ad annum DXCII. Num. VII. addit : In hanc profundam erroris foveam lapsos esse omnes recentiores Historicos , inexplorate sectantes Pauli vestigia .*

Pauca hæc adnotare operæ pretium duxi , quo scilicet omnis , qui ex *Romani Martyrologii* auctoritate , quod ad Ingenuini pietatem & sanctimoniam spectat , orriri poterat scrupulus , penitus tolleretur ; quid enim Romani Correctores præstiterint , quæ Acta præ oculis habuerint , dum illum Sanctorum fastis adscripsere , *Baronius* in *Notis* indicat , nosque supra excussimus : Quare cautius profecto doctis quibusdam viris procedendum erat , dum nullis Ingenuini inspectis Actis , nisi iis , quæ Schismatis eum arguunt ( neque enim alia supersunt ) Sabionensem illum Episcopum tanquam exploratæ sanctitatis virum nobis venditarunt ; quos inter primo forte loco recensendus est Eminentissimus Scriptor *Henricus Norisius* , qui Cap. IX. §. VI. sapius laudatæ *Disserta-*  
tio-

*tionis de Synodo Quinta*, ita de Schismaticis Aquilejensibus loquitur: *Quod si illorum quosdam ante mortem ab errore discessisse constet, ut de S. Ingenuino narravimus, de eorum pœnitentia nobis letandum est. Sed quinam ii fuerint, divinare non possumus, neque fas est de divinis judiciis temere judicare.* At unde constat, Ingenuinum ante mortem ab errore discessisse, & ubinam id probavit Norisus? Scilicet paullo ante allata modo verba, ita scripserat: *Inter Episcopos schismaticos, qui contra Apostolicam Sedem Pontificibus Pelagio II. & Gregorio Magno pro Schismate depugnarunt, fuit Ingenuinus Sabionensis Episcopus, qui primus Libellum ad Mauritium contra S. Gregorii mandata conscriptum signavit, & Apostolicæ Sedis judicium fugiens, profanum Imperatoris tribunal appellavit. Illius tamen festum peragitur Brixinæ in Rætia Secunda, unde dicendum est cum Bollando, illum respuisse, & ad meliorem frugem reversum, Bollandi conjecturæ quanti faciendæ sint, quamque ad asserendam Ingenuini sanctitatem vim habeant, jam vidimus. Nisi validiora afferantur argumenta, ab errore tandem eum recessisse non modo adeo asseveranter pronuntiandum non est, sed ne suspicari quidem merito potest.*

Cui de *Martyrologii Romani* historia plura

ta nosse animus est, is *BENEDICTI XIV.* Summi Pontificis, qui non modo vitæ integritate, verum etiam doctrinæ, & scriptorum fulgore, atque amplitudine Ecclesiæ Dei illustrat, præstantissimum adeat Opus *De Servorum Dei Beatificatione, & Beatorum Canonizatione* Lib. IV. Part. II. Cap. XVII. edit. Patavinæ. Quo quidem loco apposite ad hanc rem adnotat eximius Ecclesiæ Magister, Gregorianam Martyrologii editionem Urbano VIII. Summo Pontifice regnante, novis curis fuisse recognitam, in qua recognitione *Textus fuit multis in locis emendatus ad fidem Historiæ: minus certa commissa tempori decernenda maturius; & Sulpitius Severus (S. Martini discipulus) a Martyrologio Romano expunctus.* Sapienter autem monet, *Apostolicam Sedem non judicare, inconcussæ esse & certissimæ veritatis quacumque in Martyrologium Romanum inserta sunt . . . . nec viris in Ecclesiastica Historia peritis prohibitum dici potest confugere ad Sanctam Sedem, si novæ correctionis fundamenta suppetant;* cui proinde, quæ hætenus a nobis scripta sunt, ea qua par est animi reverentia ac demissione subjicimus. *Eruditus Lucas Holstenius (pergit idem) Prefectus Vaticanæ Basilicæ suis litteris admonuit Franciscum Mariam Florentinum, qui incumbebat in edi-*

tionem vetustioris Martyrologii Occidentalis Ecclesiæ D. Hieronymo attributi, de quo supra, ut Opus id ederet, putans eo modo corrigi posse nonnullos errores, qui post correctiones adhuc in Martyrologio nostro Romano extare dicuntur. Litteræ ipsæ prostant in Admonitionibus præviis ejusdem Florentinii ad suum Martyrologium; & ipsemet Holstenius nonnullas Romæ edidit Notas ann. MDCLXIII. ad Martyrologium Romanum; & Latinus Latini Viterbiensis in sua Bibliorheca sacra & profana edita Romæ anno MDCLXXVII. alias subjecit emendationes, quas fieri posse in examine Martyrologii existimavit. Videndæ pariter ejusdem BENEDICTI XIV. Litteræ Apostolicæ de nova Martyrologii Romani editione ad Joannem V. Portugalliæ Regem §. XVIII. & XLVI. Inter doctorum virorum in Romanum Martyrologium animadversiones non ultimo certe loco statuenda illa est, quæ circa Isidorum, & Siridonem Episcopos versatur, de quibus Die II. Januarii. Vera enim lectio, quam etiam Codex quidam ms. optimæ notæ exhibet, est hujusmodi: *Antiochiæ Syriæ Doni Episcopi ejusdem loci*, ex quibus verbis Siridonis, & Isidori vitio amanuensium enata nomina; atque ita ex uno vero Episcopo *Dono*, seu *Domno* nomine, duo, vel tres commenti-



tū a *Baronio* investi; qui locus spongia utique si quis alius indigere videtur.

XXVIII. Sed ut unde digressa est, eodemum redeat oratio, atque ad *Conjecturas* tuas, Roschmanne, tandem revertar, laudo consilium tuum quod appendicis loco, *Prudentii Hymnum* de S. Cassiano Notis illustrare institueris; in iis enim multa docte simul, atque erudite a te explicata sunt. Lætor præterea vehementer, tibi que summopere gratulor, in antiquissimo S. Georgii Cœnobio Vallis Æni Superioris ms. Codicem membraneum *Bartholomæi* nostri *Tridentini* a te detectum fuisse, uti refert Cap. III. quum præsertim Codex Barberininus, qui hætenus, quod quidem sciam, studiosis innotuit, & mutilus sit, & litteras non raro evanescentes præferat. Euge porro, ne despondeas animum, vetustiores forte adhuc latitant, qui a blattis & tineis cum quibus diu luctantur, tandem a te liberari gestiunt. Adsit cœptis tuis Fortuna, ardoremque illum, quo patriis rebus cum sacris, tum profanis illustrandis æstuas, prospero eventu secundet. Illud dumtaxat amice ac peramanter monuerim, ut partium studiis nunquam te abripi sinas, ne scilicet dum morem aliis libentius geris, seu verius aures demulces, Historiæ fides, quæ

## CXIX

quæ præ ceteris farta tectaque esse debet ;  
 detrimenti aliquid capiat. Inquisitiones il-  
 las, quid fieri, quid esse potuerit, hariolis  
 relinque : quid factum sit, quære. Conjectu-  
 ris utere, quum validior argumentandi ra-  
 tio non suppetit : at clariore luce affulgen-  
 te, ultro cæcutire noli. Homerum laudat  
*Horatius*, quod ex fumo det lucem : tu con-  
 tra ex fulgore fumum, immo tenebras vi-  
 de ne elicias. Præclara sane res est, pri-  
 mis Ecclesiæ sæculis Evangelii lumine fuis-  
 se illustratum, ea tamen gloria mendaciis  
 minime conquirenda ; nimis enim care emit-  
 tur, quod veritatis dispendio emitur. Si  
 pro Vetustate pugnare non potes, pugna  
 pro Veritate, qua nihil est vetustius. Va-  
 les ingenio, vales eruditione. Spartam aliam  
 majore cum fructu adornasses : meliorem  
 certe tibi auguror. Vale.

Ex D. Georgio VIII. Calendâs Sexti-  
 les MDCCXLIX.

F I N I S.





